

摘藻堂四庫全書薈要

史部

欽定四庫全書薈要

史部
通志卷九十



詳校官員外郎臣楊世綸

欽定四庫全書薈要卷八千九百九十六

史部

通志卷九十

宋 右迪功郎 鄭樵 漁仲 撰

列傳三

春秋

晉

師服 士為 荀息 里克 平 慶鄭 呂飴甥

胥臣 狐突 狐偃 子射 先軫 介推 陽處父

郤芮 郤缺 郤克 郤至 士會 士燮 范

匄 范鞅 趙衰 趙盾 趙武 趙鞅 趙無

恤 荀林父 荀瑩 荀偃 荀吳 荀寅 伯

宗 羊舌肸 司馬女齊 祁奚 解揚 欒書

子鍼 魏絳 父犇 魏舒 士彌牟 韓厥 韓起 苗賁

皇 屈巫

師服者事晉穆侯為大夫初穆侯之夫人姜氏以條之
役生太子命之曰仇其弟以千畝之戰生命曰成師師

服曰異哉君之名子也夫名以制義義以出禮禮以體政政以正民是以政成而民聽易則生亂嘉耦曰妃怨耦曰仇古之命也今君命太子曰仇弟曰成師始兆亂矣兄其替乎昭侯之元年封成師爲曲沃伯是曰桓叔使靖侯之孫欒賓傅之師服曰吾聞國家之立也本大而末小是以能固故天子建國諸侯立家卿置側室大夫有貳宗士有隸子弟庶人工商各有分親皆有等衰是以民服事其上而下無覬覦今晉甸侯也而建國本

既弱矣其能久乎七年晉潘父弑昭侯而納桓叔不克
其後晉竟爲曲沃所滅終如師服之言

士蔿字子輿陶唐氏之苗裔也歷虞夏商周成王遷之
於杜爲伯宣王殺杜伯其子隰叔奔晉爲士師故爲士
氏獻公之六年公患桓莊之族偏以問士蔿士蔿曰去
富子則羣公子可謀也已公曰爾試其事士蔿與羣公
子謀譖富子而去之七年又與羣公子謀殺游氏之二
子士蔿告晉侯曰可矣不過二年君必無患八年士蔿

使羣公子盡殺游氏之族乃城聚而處之冬晉侯圍聚
盡殺羣公子如士爲之計焉九年士爲爲大司空夏士
爲城絳以深其宮秋虢人侵晉冬又侵晉晉侯將伐之
士爲曰不可虢公驕若驟得勝於我必棄其民無衆而
後伐之欲禦我誰與夫禮樂慈愛戰所蓄也夫民讓事
樂和愛親哀喪而後可用也虢弗畜也亟戰將饑虢竟
不能撫其民而晉滅之獻公娶于賈無子烝於齊姜生
秦穆夫人及太子申生又娶二女於戎大戎狐姬生重

耳小戎子生夷吾晉伐驪戎驪戎男女以驪姬歸生奚
齊其娣生卓子驪姬嬖欲立其子賂外嬖梁五與東闕
嬖五使言於公曰曲沃君之宗也蒲與二屈君之疆也
不可以無主宗邑無主則民不威疆場無主則啓戎心
戎之生心民慢其政國之患也若使太子主曲沃而重
耳夷吾主蒲與屈則可以威民而懼戎且旌君伐公說
故作二軍公將上軍太子申生將下軍趙夙御戎畢萬
為右以滅耿滅霍滅魏還為太子城曲沃士蒍曰太子

不得立矣分之都城而位以卿先爲之極又焉得立不
如逃之無使罪至爲吳太伯不亦可乎猶有令名與其
及也且諺曰心苟無瑕何恤乎無家天若祚太子其無
晉乎太子不用其言卒以讒自殺初獻公使士爲爲二
公子築蒲與屈不慎寘薪焉夷吾訴之公使讓之士爲
稽首而對曰臣聞之無喪而戚憂必讎焉無戎而城讎
必保焉寇讎之保又何慎焉守官廢命不敬固讎之保
不忠失忠與敬何以事君詩云懷德維寧宗子惟城君

其修德而固宗子何城如之三年將尋師焉焉用慎退而曰狐裘尨茸一國三公吾誰適從及士蔦卒子穀嗣爲司空襄公三年與諸侯會于垂隴襄公將使士穀梁益耳將中軍登箕鄭父先都將上軍先克曰狐趙之勲不可廢也從之故箕鄭父先都士穀梁益耳作亂晉人皆殺之

荀息晉公族也隰叔之後食邑於荀曰荀氏獻公世頻有虢師公患之十九年荀息請以屈產之乘垂棘之璧

假道於虞以伐虢公曰是吾寶也對曰寶出之內府藏之外府馬出之內廄繫之外廄君何喪焉公曰宮之奇存焉曰宮之奇之爲人也懦而不能彊諫且少長於君君暱之雖諫將不聽乃使荀息假道於虞曰冀爲不道入自顛軫伐鄆三門冀之既病則亦惟君故今虢爲不道保於逆旅以侵敝邑之南鄙敢請假道以請罪于虢虞公許之且請先伐虢宮之奇諫之不聽遂起師故里克荀息帥師會虞師伐虢滅下陽二十二年復假道於

虞以伐虢宮之奇諫曰虢虞之表也虢亡虞必從之晉不可啟寇不可翫一之謂甚其可再乎諺所謂輔車相依脣亡齒寒者其虞虢之謂也公曰晉吾宗也豈害我哉對曰太伯虞仲太王之昭也太伯不從是以不嗣虢仲虢叔王季之穆也爲文王卿士勲在王室藏於盟府將虢是滅何愛於虞且虞能親於桓莊乎桓莊之族何罪而以爲戮不唯偏乎親以寵偏猶尚害之況以國乎公曰吾享祀豐潔神必據我對曰臣聞之鬼神非人實

親唯德是依故周書曰皇天無親唯德是輔又曰黍稷
非馨明德唯馨又曰民不易物惟德繫物如是則非德
民不和神不享矣神所馮依將在德矣若晉取虞而明
德以薦馨香神其吐之乎弗聽許晉使宮之奇以族行
曰虞不臘矣在此行也晉不更舉矣八月晉圍上陽十
有二月晉滅虢虢公醜奔京師師還館于虞遂襲虞滅
之執虞公及其大夫井伯以勝秦穆姬而修虞祀且歸
其職貢於王荀息取璧與馬而歸於公公曰寶則吾寶

也雖然吾馬之齒亦已長矣獻公之末年以驪姬故欲
易太子而立其子奚齊使荀息傅之公疾召之曰以是
藐諸孤辱在大夫若之何稽首而對曰臣竭其股肱之
力加之以忠貞其濟君之靈也不濟則以死繼之公曰
何謂忠貞對曰公家之利知無不爲忠也送往事居耦
俱無猜貞也獻公卒里克將殺奚齊先告荀息曰三怨
將作秦晉輔之子將何如荀息曰將死之里克曰無益
也荀息曰吾與先君言矣不可以貳能欲復言而愛身

乎雖無益也將焉辟之且人之欲善誰不如我我欲無
貳而能謂人已乎及里克殺奚齊荀息將死之人曰不
如立卓子而輔之荀息立公子卓以葬獻公里克又殺
卓子于朝荀息死之君子曰詩所謂白圭之玷尚可磨
也斯言之玷不可爲也荀息有焉

里克晉大夫獻公使爲太子申生傅公將易太子使太
子伐山戎里克諫曰太子奉冢祀社稷之粢盛以朝夕
視君饒者也故曰冢子君行則守有守則從從曰撫軍

守曰監國古之制也夫帥師專行謀誓軍旅君與執政之所圖也非太子之事也師在制命而已稟命則不威專命則不孝故君之適嗣不可以帥師君失其官帥師不威將焉用之且臣聞臯落氏將戰君其舍之公曰寡人有子未知其誰立焉不對而退見太子太子曰吾其廢乎對曰告之以臨民教之以軍旅不共是懼何故廢乎且子懼不孝無懼弗得立修已而不責人則免於難矣驪姬將害太子告優施曰君既許我殺太子而立奚

齊矣吾難里克奈何優施曰吾來里克一日而已子爲
我具特羊之饗吾以從之飲酒我優也言無郵驪姬許
諾乃具使優施飲里克酒中飲優施起舞謂里克妻曰
主孟啗我我教茲暇豫事君乃歌曰暇豫之吾吾音魚不
如烏烏人皆集於苑已獨集於枯里克笑曰何謂苑何
謂枯優施曰其母爲夫人其子爲君可不謂苑乎其母
既死其子又有謗可不謂枯乎枯且有傷優施出里克
辟奠不餐而寢夜半召優施曰曩而言戲乎抑有所聞

之乎曰然君既許姬殺太子而立奚齊謀既成矣里克
曰吾秉君以殺太子吾不忍通復故交吾不敢中立其
免乎優施曰免旦而里克見平鄭曰難將作矣優施告
我君謀成矣將立奚齊矣平鄭曰子何謂曰吾對以中
立鄭曰惜也不如曰不信以疏之亦固太子以攜之多
爲之故以變其志志少疏乃可間也今子曰中立况固
其謀也彼有成矣難以得間里克曰徃言不言及也且
人中心唯無忌之何可敗也子將何如平鄭曰我無心

是故事君者以君爲心制不在我里克曰弑君以爲廉
長廉以驕心因驕以制人家不敢抑僥志以從君爲廢
人以自利也利方以求人吾不能將伏也明日稱疾不
朝三旬而難作驪姬以君命命太子曰君夢齊姜必速
祭之太子祭于曲沃歸胙于公公田姬寘諸宮六日公
至毒而獻之公祭之地地墳與犬犬斃與小臣小臣亦
斃姬泣曰賊由太子太子奔新城公殺其傅杜原款或
謂太子子辭君必辨焉太子曰君非姬氏居不安食不

飽我辭姬必有罪君老矣吾又不樂曰子其行乎太子
曰君實不察其罪被此名也以出人誰納我遂縊于新
城獻公卒奚齊立爲君里克將殺奚齊以告荀息荀息
拒之語具荀息傳中又以告丕鄭丕鄭曰子勉之我爲
子行之子帥七輿大夫以待我我使狄以動之援秦以
搖之立其薄者可以得重賂厚者可使無入國誰之國
也里克曰不可克聞之夫義者利之足也貪者怨之本
也廢義則利不立厚貪則怨生夫孺子豈獲罪於民特

以驪姬之惑盡君而誣國人讒羣公子而奪之利使君
迷亂信而亡之殺無罪以爲諸侯笑使百姓莫不有藏
惡於其心中恐其如壅大川潰而不可救禦也是故將
殺奚齊而立子之在外者以定民弭憂於諸侯且爲援
庶幾曰諸侯義而撫之百姓欣而奉之國可以固今殺
君而賴其富貪且反義則民怨反義則富不爲賴賴富
而民怨亂國而身殆懼爲諸侯載不可常也不鄭許諾
於是殺奚齊卓子及驪姬而請君子秦秦人納公子夷

吾是爲惠公惠公立將殺里克以說使謂里克曰微子則不及此雖然子弑二君一大夫矣爲子君者不亦難乎對曰不有廢也君何以興欲加之罪其無辭乎臣聞命矣伏劍而死於是平鄭聘于秦故不及後歸自秦冀芮殺之其子豹奔秦

慶鄭事惠公爲大夫惠公之求入於秦也賂秦以河外之列城五東盡虢略南及華山內及解梁城既立而背之即位之四年晉饑使乞糴于秦秦穆公輸粟于晉自

雍及絳相繼命之曰汎舟之役明年秦饑使乞糴于晉
惠公不與慶鄭曰背施無親幸災不仁貪愛不祥怒鄰
不義四德皆失何以守國虢射曰皮之不存毛將安傅
慶鄭曰棄信背鄰患孰恤之無信患作失援必斃是則
然矣虢射曰無損於怨而厚於寇不如勿與慶鄭曰背
施幸災民所棄也近猶讎之况怨敵乎弗聽退曰君其
悔是哉六年秦穆公來伐公謂慶鄭曰寇深矣若之何
對曰君實深之可若何公曰不孫卜右慶鄭吉弗使步

揚御戎家僕徒爲右乘小駟鄭入也慶鄭曰古者大事必乘其產生其水土而知其人心安其教訓而服習其道唯所納之無不如志今乘異產以從戎事及懼而變將與人易亂氣狡憤陰血周作張脉僨興外彊中乾進退不可周旋不能君必悔之弗聽九月惠公逆秦師使韓簡視師復曰師少於我鬪士倍我公曰何故對曰出因其資入用其寵饑食其粟三施而無報是以來也今又擊之我怠秦奮倍猶未也公曰一失不可狃况國乎

遂使請戰曰寡人不佞能合其衆而不能離也君若不
還無所逃命秦伯使公孫枝對曰君之未入寡人懼之
入而未定列猶吾憂也苟列定矣敢不承命韓簡退曰
吾幸而得囚遂戰於韓原戎馬還濘而止公號慶鄭慶
鄭曰愼諫違卜固敗是求又何逃焉去之梁由靡御韓
簡虢射爲右輅秦伯將止之鄭以救公誤之遂失秦伯
秦獲公以歸晉大夫反首拔舍從之秦伯使辭焉曰二
三子何其感也寡君之從君而西也亦晉之妖夢是踐

豈敢以至晉大夫三拜稽首曰君履后土而戴皇天皇
天后土實聞君之言羣臣敢在下風穆姬聞公將至以
太子瑩弘與女簡璧登臺而履薪焉使以免服衰絰逆
且告曰上天降災使我兩君匪以玉帛相見而以興戎
若晉君朝以入則婢子夕以死夕以入則朝以死唯君
裁之乃舍諸靈臺大夫請以入公曰獲晉侯以厚歸也
既而喪歸焉用之大夫其何有焉且晉人感憂以重我
天地以要我不圖晉憂重其怒也我食吾言背天地也

重怒難任背天不祥必歸晉君公子縶曰不如殺之無聚慝焉子桑曰歸之而質其太子必得大成晉未可滅而殺其君祇以成惡且史佚有言曰無始禍無怙亂無重怒重怒難任陵人不祥乃許晉平公將歸蛾析謂慶鄭曰盍行乎對曰陷君於敗敗而不死又使失刑非人臣也臣而不臣行將焉入公歸殺慶鄭而後入

瑕吕飴甥字子金晉大夫食采於陰亦曰陰飴甥惠公之見獲於秦也秦將許之平而歸之公使卻乞告子金

且召之子金教之言曰朝國人而以君命賞且告之曰孤雖歸辱社稷矣其卜貳圉也衆皆哭晉於是乎作爰田子金曰君亡之不恤而羣臣是憂惠之至也將若君何衆曰何爲而可對曰征繕以輔孺子諸侯聞之喪君有君羣臣輯睦甲兵益多好我者勸惡我者懼庶有益乎衆說晉於是乎作州兵十月飴甥會秦伯盟于王城秦伯曰晉國和乎對曰不和小人恥失其君而悼喪其親不憚征繕以立圉也曰必報讎寧事戎狄君子愛其

君而知其罪不憚征繕以待秦命曰必報德有死無二
以此不和秦伯曰國謂君何對曰小人感謂之不免君
子恕以爲必歸小人曰我毒秦秦豈歸君君子曰我知
罪矣秦必歸君貳而執之服而舍之德莫厚焉刑莫威
焉服者懷德貳者畏刑此一役也秦可以霸納而不定
廢而不立以德爲怨秦不其然秦伯曰是吾心也改館
晉侯饋七牢焉

胥臣字季子食邑於白曰白季官爲司空又曰司空季

子獻公之二十一年從公子重耳奔狄惠公卒公子入秦將以求納焉秦穆公歸女五人懷嬴與公子使奉匜沃盥既而揮之嬴怒曰秦晉匹也何以卑我公子懼降服囚命穆公見公子曰寡人之適此爲才子圉之辱備嬪嬙焉欲以成婚而懼離其惡名非此則無故不敢以禮致之懼之故也公子有辱寡人之罪也唯命是聽公子欲辭季子曰同姓爲兄弟黃帝之子二十五人其同姓者二人而已唯青陽與夷鼓皆爲己姓青陽方雷氏

之甥也夷鼓彤魚氏之甥也其同生而異姓者四母之
別爲十二姓凡黃帝之子二十五宗其得姓者十四人
爲十二姓姬酉祈已滕箴任荀倭佶僂依是也唯青陽
氏與蒼林氏同于黃帝故皆爲姬姓同德之難也如是
昔少典娶于有蟠氏生黃帝炎帝黃帝以姬水成炎帝
爲姜二帝用師以相濟也異德之故也異姓則異德異
德則異類異類雖近男女相及以生民也同姓則同德
同德則同心同心則同志同志相遠男女不相及畏黷

敬也黷則生怨怨亂毓災災毓滅姓是故娶妻避其同
姓畏亂災也故異德合姓同德合義義以導利利以阜
姓姓利相更成而不遷乃能攝固保其上房今子於子
圉道路之人也取其所棄以濟大事不亦可乎公子於
是歸女而納幣且逆之公子之在秦也親筮之曰尚有
晉國得貞屯悔豫皆八也筮史占之皆曰不吉閉而不通
爻無爲也季子曰吉是在周易皆利建侯不有晉國以
輔王室安能建侯我命筮曰尚有晉國告我曰利建侯

得國之務也吉孰大焉震車也坎水也坤土也屯厚也
豫樂也車班外內順以訓之泉貨以資之土厚而樂其
實不有晉國何以當之震雷也車也坎勞也水也衆也
主雷與車而尚水與衆車有震武衆順文也文武具厚
之至也故曰屯其繇曰元亨利貞勿用有攸往利建侯主震
雷長也故曰元衆而順嘉也故曰亨內有震雷故曰利貞
車上水下必伯小事不濟壅也故曰勿用有攸往一夫
之行也衆順而有武威故曰利建侯坤母也震長男也

母老子彊故曰豫其繇曰利建侯行師居樂出威之謂也得國之卦也既而穆公納公子于晉是為文公文公立以季子為卿代先軫佐下軍城濮之戰季子以虎皮蒙馬先犯陳蔡陳蔡潰楚師是以大敗文公嘗學書於季子三日曰吾不能行也咫聞則多矣對曰然而多聞以待能者不猶愈也襄公之為太子也公將使陽處父為之傳問於季子曰處父其能教誨驪也使之善乎對曰是在驪也遽篠不可使俯戚施不可使仰焦僥不可

使舉侏儒不可使援矇眊不可使視噐瘖不可使言聾
聵不可使聽童昏不可使謀質將善而賢良贊之則濟
可竢若其質有違教將不入其何善之爲臣聞昔者大
任娠文王不變少洩於豕牢而得文王不加疾焉文王
在母不憂在傅弗勤處師弗煩事主不怒孝友二號而
惠慈二蔡刑于大姒比於諸弟詩云刑于寡妻至于兄
弟以御于家邦於是乎用四方之賢良及其即位也詢
于八虞而詔于虢度於閔天而謀於南宮諏於蔡原而

訪於辛尹重之以周邵畢榮億寧百神而柔和萬民故
詩云惠于宗公神罔時恫若是則文王非專教誨之力
也公曰然則教無益乎對曰教爲文益其質故人生而
學非學不入公曰柰夫八疾何對曰官司之所材也戚
施直縛遽蔭蒙瑯侏儒扶盧矇瞍修聲聾聵司火童昏
嚚瘖焦僂官師之所不材也以實裔土夫教者因體能
質而利之者也若川然有原卬浦而後大季子使舍於
冀野見冀邵薳其妻饁之敬歸而言於公公以爲下軍

大夫馮襄公六年季子卒

狐突字伯行文公之外祖父也其先本唐叔之後在戎狄者爲狐氏獻公娶二女於戎大狐姬生文公小戎子生惠公狐突以狐姬故事晉爲大夫獻公使傅太子申生獻公之十七年以驪姬之惑也欲易太子冬十二月使申生將兵伐東山臯落氏公衣之偏衣佩之金玦狐突御戎先友爲右梁餘子養御罕夷先丹木爲右羊舌大夫爲尉先友曰衣身之偏握兵之要在此行也子其

勉之偏躬無慝兵要遠災親以無災又何患焉狐突歎
曰時事之徵也衣身之章也佩衷之旗也故敬其事則
命以始服其身則衣之純用其衷則佩之度今命以時
卒閱其事也衣之危服遠其躬也佩以金玦棄其衷也
服以遠之時以閱之危涼冬殺金寒玦離胡可恃也雖
欲勉之狄可盡乎梁餘子養曰帥師者受命於廟受脤
於社有常服矣不獲而危命可知也死而不孝不如逃
之罕夷曰危奇無常金玦不復雖復何爲君有心矣先

丹木曰是服也狂夫阻之曰盡敵而反敵可盡乎雖盡敵猶有內讒不如違之狐突欲行羊舌大夫曰不可違命不孝棄事不忠雖知其寒惡不可取子其死之太子將戰狐突諫曰不可昔辛伯諗周桓公云內寵並后外寵二政嬖子配適大都耦國亂之本也周公弗從故及於難今亂本成矣立可必乎孝而安民子其圖之與其危身以速罪也太子不聽遂出戰敗狄而還狐突閉門不出既而讒言日益深太子不能自明因自殺將死使

猛足言於狐突曰申生有罪不用伯氏之言以至於死
申生不敢愛其死雖然吾君老矣國家多難伯氏不出
而圖吾君伯氏苟出而圖吾君申生受賜而死及惠公
立改葬其太子狐突適下國遇太子太子使登僕而告
之曰夷吾無禮余得請於帝矣將以晉畀秦秦將祀余
對曰臣聞之神不歆非類民不祀非族君祀無乃殄乎
且民何罪失刑乏祀君其圖之君曰諾吾將復請七日
新城西偏將有巫者而見我焉許之遂不見及期而往

告之曰帝許我罰有罪矣敝於韓惠公六年秦晉戰于韓原秦獲晉侯以歸惠公卒懷公命無從亡人期期而不至無赦狐突之子毛及偃從重耳在秦弗召懷公執狐突曰子來則免對曰子之能仕父教之忠古之制也策名委質貳乃辟也今臣之子名在重耳有年數矣若又召之教之貳也父教子貳何以事君刑之不濫君之明也臣之願也淫刑以逞誰則無罪臣聞命矣伏劍而死

狐偃字子犯狐突之子也驪姬既讒殺太子申生復譖
二公子將逐之獻公二十二年子犯奉公子重耳出奔
狄獻公卒里克殺驪姬之子奚齊卓子使告公子求入
而納之公子以告子犯子犯不可曰夫堅樹在始始不
固本終必槁落夫長國者唯知哀樂喜怒之節是以導
民不哀喪而求國難因亂以入殆以喪得國則必樂喪
樂喪必哀生因亂以入則必喜亂喜亂必怠德是哀樂
喜怒之節易也何以導民重耳曰非喪誰代非亂誰納

我子犯曰偃也聞之喪亂有大大喪大亂之刻也父
母死爲大喪讒在兄弟爲大亂今適當之是故難公子
重耳出見使者曰子惠顧亡人重耳父生不得供洒掃
之臣死又不敢莅喪以重其罪且辱大夫敢辭夫固國
者在親衆而善鄰在因民而順之苟衆所利鄰國所立
大夫其從之重耳不敢違已而秦穆公使公子絳弔公
子重耳曰寡君使絳弔公子之憂又重之以喪寡人聞
之得國常於喪失國常於喪時不可失喪不可久公子

其圖之重耳告子犯子犯曰不可亡人無親信人以爲親是故置之者不殆父死在堂而求利人孰仁我人實有之我以微倖人孰信我不仁不信將何以長利公子重耳出見使者君惠弔亡臣又重有命重耳身亡父死不得與於哭泣之位又何敢有他志以辱君義再拜不稽首起而哭退而不私公子繫反命穆公公曰仁人也再拜不稽首不役爲後也起而哭愛其父孝也退而不私不役於利也秦人遂納公子夷吾是爲惠公惠公之

七年重耳去狄之齊過衛衛文公不禮焉出於五鹿乞食於野人與之塊公子怒欲鞭之子犯曰天賜也稽首受而載之及齊齊桓公妻之有馬二十乘公子安之從者以爲不可將行謀於桑下蠶妾在其上聞之以告姜氏姜氏殺之而謂公子曰子有四方之志其聞之者吾殺之矣公子曰無之姜曰行也懷與安實敗名公子不可姜與子犯謀醉而遣之醒以戈逐子犯曰若無所濟吾食舅氏肉其知饜乎子犯走且對曰若無所濟吾未

知死所誰能與豺狼爭食若克有濟無亦晉之柔嘉足以甘食偃肉腥臊將焉用之乃止遂行過曹過鄭俱不禮焉及楚楚成王饗之曰公子若反晉國則何以報不穀對曰子女玉帛則君有之羽毛齒革則君地生焉其波及晉國者君之餘也其何以報君曰雖然何以報我對曰若以君之靈得反晉國晉楚治兵遇於中原其辟君三舍若不獲命其左執鞭弭右屬橐鞬以與君周旋子玉請殺之成王曰晉公子廣而儉文而有禮其從者

肅而寬忠而能力晉侯無親內外惡之吾聞姬姓唐叔
之後其後衰者也其將由晉公子乎天將興之誰能廢
之違天必有大咎乃送諸秦秦穆公遂納之及河子犯
以璧授公子曰臣負羈紲從君巡於天下臣罪多矣臣
猶知之而况君乎請由此亡公子曰所不與舅氏同心
者有如此水投其璧於河遂濟入于晉師遂入于曲沃
朝于武宮即位于朝是為文公文公之元年王室有叔
帶之亂襄王出居于鄭秦穆公師于河上將以納王狐

偃言於文公曰求諸侯莫如勤王諸侯信之且大義也
繼文之業而信宣於諸侯今爲可矣公以爲然故辭秦
師而下次于陽樊右師圍溫左師逆王入襄王于周取
王弟帶于溫殺之王賜晉河內陽樊之地四年楚成王
伐宋文公率齊秦之師以救宋成王命令尹子玉無從
晉師子玉固請戰遂從晉師晉師退軍吏曰以君辟臣
辱也且楚師老矣何故退子犯曰師直爲壯曲爲老豈
在久乎微楚之惠不及此退三舍辟之所以報也背惠

食言以亢其讎我曲楚直其衆素飽不可謂老我退而
楚還我將何求若其不還君退臣犯曲在彼矣退三舍
楚衆欲止子玉不可夏晉師及諸侯之師次於城濮楚
師背鄴而舍晉侯患之聽輿人之誦曰原田每每舍其
舊而新是謀公疑焉子犯曰戰也戰而捷必得諸侯若
其不捷表裏山河必無害矣文公夢與楚子搏楚子伏
已而監其腦是以懼子犯曰吉我得天楚服其罪吾且
柔之矣既戰大敗楚師于城濮子玉死之文公歸國行

賞以狐偃爲首文公始入而教其民二年欲用之子犯
曰民未知義未安其居於是乎出定襄王入務利民民
懷生矣將用之子犯曰民未知信未宣其用於是伐原
以示之信民易資者不求豐焉明要其辭公曰可矣子
犯曰民未知禮未生其共於是大蒐以示之禮作執秩
以正其官民聽不惑而後用之出穀戍釋宋圍一戰而
霸文之教也子犯卒子狐射姑立射姑字季佗食邑于
賈故曰賈季與父皆有從亡之功襄公六年蒐于夷作

三軍使狐射姑將中軍趙盾佐之陽處父改蒐而易之
使賈季佐趙孟且曰使能賈季怒及襄公卒賈季使召
公子樂于陳而立之趙盾不從使殺公子于郕故賈季
殺處父以奔狄

先軫晉大夫食采於原亦曰原軫文公四年楚成王帥
諸侯之師以圍宋宋使公孫固來乞師先軫曰報施救
患取威定霸於是乎在矣狐偃曰楚始得曹而新昏於
衛若伐曹衛楚必救之則齊宋免矣於是乎蒐于被廬

作三軍謀元帥使卻縠將中軍卻縠佐之使狐偃將上
軍讓於狐毛而佐之命趙衰爲卿讓於欒枝先軫使欒
枝將下軍先軫佐之明年卻縠卒先軫自下軍佐超將
上軍上德也楚圍宋急宋人使門尹般來告急公曰宋
人告急舍之則絕告楚不許我欲戰矣齊秦未可若之
何先軫曰使宋舍我而賂齊秦藉之告楚我執曹君而
分曹衛之田以賜宋人楚愛曹衛必不許也喜賂怒頑
能無戰乎公說執曹伯分曹衛之田以畀宋人楚成王

入居于申使申叔時去穀使子玉去宋曰無從晉師晉
侯在外十九年矣而果得晉國險阻艱難備嘗之矣民
之情僞盡知之矣天假之年而除其害天之所置其可
廢乎軍志曰允當則歸又曰知難而退又曰有德不可
敵此三志者晉之謂矣子玉使伯棼請戰曰非敢必有
功也願以間執讒慝之口王怒少與之師唯西廣東宮
與若敖之六卒實從之子玉使宛春告於晉師曰請復
衛侯而封曹臣亦釋宋之圍子犯曰子玉無禮哉君取

一臣取二不可失也先軫曰子與之定人之謂禮楚一言而定三國我一言而亡之我則無禮何以戰乎不許楚言是棄宋也救而棄之謂諸侯何楚有三施我有三怨怨讎已多將何以戰不如私許復曹衛以攜之執宛春以怒楚既戰而後圖之公說乃執宛春於衛且私許復曹衛曹衛告絕於楚子玉怒從晉師晉師爲之退三舍次于城濮子玉使鬬勃請戰曰請與君之士戲君馮軾而觀之得臣與寓目焉文公使欒枝對曰寡君聞命

矣楚君之惠未之敢忘是以此爲大夫退其敢當君
乎既不獲命矣敢煩大夫謂二三子戒爾車乘敬爾君
事詰朝將見晉車七百乘鞹鞢鞢鞢晉侯登有莘之虛
以觀師曰少長有禮其可用也遂伐木以益其兵晉師
陳于莘北胥臣以下軍之佐當陳蔡子玉以若敖之六
卒將中軍曰今日必無晉矣子西將左子上將右胥臣
蒙馬以虎皮先犯陳蔡陳蔡奔楚右師潰狐毛設二旆
而退之欒枝以輿曳柴而僞遁楚師馳之原軫卻縠以

中軍公族橫擊之狐毛狐偃夾攻子西楚左師潰楚師敗績文公是故策命于王爲侯伯先軫之功也襄公之初秦穆公將襲鄭訪諸蹇叔蹇叔曰勞師以襲遠非所聞也公不聽秦師遂東滅滑而還先軫曰秦違蹇叔而以貪勤民天奉我也奉不可失敵不可縱縱敵生患違天不祥必伐秦師欒枝曰未報秦施而伐其師其爲死君乎先軫曰秦不哀吾喪而伐我同姓秦則無禮何施之爲吾聞之一日縱敵數世之患也謀及子孫可謂死

君乎遂發命遽興姜戎子墨衰絰梁弘御戎萊駒爲右
敗秦師于殽獲百里孟明視西乞術白乙丙以歸文嬴
請三帥曰彼實構吾二君寡君若得而食之不厭君何
辱討焉使歸就戮于秦以逞寡君之志若何公許之先
軫怒曰武夫力而拘諸原婦人暫而免諸國墮軍實而
長寇讎亡無日矣不顧而唾及狄伐晉公敗狄于箕先
軫曰匹夫逞志於君而無討敢不自討乎免胄入狄師
死焉狄人歸其元面如生公命其子且居將中軍

介子推文公之微臣也始文公去國從者五人將歸即位羣臣多自以爲功推竊恥之文公之元年秦送文公至河咎犯曰臣從君周旋天下過亦多矣臣猶知之況於君乎請亡要文公而與之盟時推從在船中笑曰天寶開公子子犯以爲己功而要市於君固足羞也吾不忍與同位乃自隱文公新立周襄王以弟帶難出居鄭告急於晉文公方發兵是以賞從亡者未至子推子推亦不言祿祿亦不及子推曰獻公有子九人唯君在矣

惠懷無親外內棄之天未絕晉必將有主主晉祀者非
君而誰天實開之二三子以爲己功不亦誣乎竊人之
財猶謂之盜况貪天之功以爲己力乎下義其罪上賞
其姦上下相蒙難與處矣其母曰盍亦求之以死誰愬
子推曰尤而效之罪有甚焉且出怨言不食其祿母曰
亦使知之若何對曰言身之文也身欲隱焉用文之文
之是求顯也其母曰能如此乎與女偕隱至死不復見
子推從者憐之乃懸書宮門曰龍欲上天五蛇爲輔龍

已上天四蛇各入其宇一蛇獨怨終不見處所文公出見其書曰此介子推也吾方憂王室未圖其功使人召之則亡遂求所在聞其入縣上山中於是文公環縣上山中而封之以爲介推田號介山曰以記吾過且旌善人

陽處父晉大夫文公以爲孤卿謂之陽太傅文公九年楚鬬辛請平于晉公使陽處父報之晉楚使命之交始於此襄公九年晉敗秦師于殽獲百里孟明視西乞術

白乙丙以歸文嬴請三帥公舍之先軫有辭公使處父
追之及河則在舟中矣釋左驂以公命贈孟明欲使還
拜而執之也孟明覺而遂去之冬處父侵蔡楚子上救
之與晉師夾泚而軍陽子患之使謂子上曰吾聞之文
不犯順武不違敵子若欲戰則吾退舍子濟而陳遲速
唯命不然紓我老師費財亦無益也乃駕以待子上欲
涉大孫伯曰不可晉人無信半涉而薄我悔敗何及不
如紓之乃退舍陽子宣言曰楚師遁矣遂歸楚師亦歸

楚以子上受晉賂而退也恥而殺之二年公以魯之不朝也致討焉魯文公來朝公使處父盟公以恥之四年楚師圍江處父帥師伐楚以救江門于方城遇息公子朱而還七年公蒐于夷舍二軍使狐射姑將中軍趙盾佐之陽處父至自溫改蒐于董易中軍陽子成季之屬也故黨於趙氏且謂趙盾能曰使能國之利也是以上之是歲襄公薨靈公少晉人以難故欲立長君趙孟欲立公子雍賈季曰不如公子樂使召公子樂于陳趙孟

使殺諸郢賈季怨陽子之比於趙孟且易其班也而知其無援於晉使續鞠居殺處父趙孟於是殺鞠居賈季奔狄初處父聘于衛反過甯甯嬴從之及溫而還其妻問之嬴曰以剛商書曰沈潛剛克高明柔克夫子壹之其不沒乎天爲剛德猶不干時況在人乎且華而不實怨之所聚也犯而聚怨不可以定身余懼不獲其利而離其難是以去之明年而處父及於難

卻芮姬姓晉公族也其先食邑於卻故以爲氏芮爲晉

大夫受采於冀又曰冀芮芮少事公子夷吾驪姬之難公子重耳奔狄夷吾將從之冀芮曰後出同走罪也不如之梁梁近秦而幸焉乃之梁居四年而獻公卒里克殺奚齊卓子冀芮使夷吾重賂秦以求入曰人實有國我何愛焉入而能民土於何有夷吾從之賂秦以河外之列城五穆公許之穆公問於冀芮曰公子誰恃對曰臣聞之亡人無黨有黨必有讎夷吾之少也弱不好弄戲不過所復怒不及色及其長也不改其故出亡無怨

於國而衆安之不然夷吾不佞其誰能恃乎君子謂冀
芮善以微勸也穆公遂納夷吾于晉是爲惠公惠公立
殺里克而背秦賂使平鄭聘于秦且謝緩賂平鄭黨於
里克言於秦穆公曰呂甥卻稱冀芮實爲不從若重問
以召之臣出晉君君納重耳蔑不濟矣穆公使泠至報
問且召三子冀芮曰幣重而言甘誘我也遂殺平鄭祁
舉及七輿大夫左行共華右行賈華叔堅驪欬纍虎特
宮山祁皆里平之黨也及惠公卒懷公立秦納文公懷

公奔高梁呂甥卻芮畏僂將焚公宮而弑文公焉初獻公使寺人披伐文公於蒲文公踰垣而走披斬其祛僅而獲免至是披請見公使讓之且辭焉曰蒲城之役君命一宿女即至其後余從狄君田女爲惠公來求殺余命女三宿女中宿至雖有君命何其速也夫祛猶在女其行乎對曰臣謂君之入也其知之矣若猶未也又將及難君命無二古之制也除君之惡唯力是視蒲人狄人余何有焉今君即位其無蒲狄乎齊桓公置射鉤而

使管仲相君若易之何辱命焉行者甚衆豈唯刑臣公見之以難告於是文公潛會秦穆公于王城既而公宮火瑕甥冀芮不獲公乃如河上穆公誘而殺之

卻成子缺冀芮之子也初臼季使過冀見卻缺耨其妻饁之相待如賓與之歸言諸文公曰敬德之聚也能敬必有德德以治民君請用之臣聞之出門如賓承事如祭仁之則也公曰其父有罪可乎對曰舜之罪也殛鯀其舉也興禹管敬仲桓之賊也實相以濟康誥曰父不

慈子不祗兄不友弟不共不相及也詩曰采芣采菲無
以下體君取節焉可也文公以爲下軍大夫襄公元年
狄伐晉公敗狄于箕成子獲白狄子反自箕公以一命
命成子爲卿復與之冀亦未有軍行以再命命先茅之
縣賞胥臣曰舉郤缺子之功也襄公二年晉伐衛取其
邑靈公元年趙盾爲政成子曰日衛不睦故取其地今
已睦矣可以歸之叛而不討何以示威服而不柔何以
示懷非威非懷何以示德無德何以主盟子爲正卿以

主諸侯而不務德將若之何夏書曰戒之用休董之用威勸之以九歌勿使壞九功之德皆可歌也謂之九歌六府三事謂之九功水火金木土穀謂之六府正德利用厚生謂之三事義而行之謂之德禮無禮不樂所由叛也若吾子之德莫可歌也其誰來之盍使睦者歌吾子乎宣子說之六年代箕鄭將上軍新城之盟蔡人不與成子以上軍下軍伐蔡曰君弱不可以怠遂入蔡以城下之盟而還成公六年趙盾卒胥克有蠱疾成子爲

政秋廢胥克使趙朔佐下軍明年楚子爲厲之役故伐
鄭成子救鄭鄭伯敗楚師于柳林景公二年成子求成
于衆狄衆狄疾赤狄之役遂服於晉秋公往會衆狄于
攢函是行也諸大夫欲召狄成子曰吾聞之非德莫如
勤非勤何以求人能勤有繼其從之也詩曰文王既勤
止文王猶勤况寡德乎

卻獻子克成子之子也成子卒獻子佐上軍景公之八
年公使獻子徵會于齊齊頃公以其跛也帷婦人使觀

之獻子登婦人笑於房獻子怒出而誓曰所不此報無
能涉河獻子先歸使欒京廬待命于齊曰不得齊事無
復命矣獻子至請伐齊公弗許請以其私屬又弗許是
時范武子將老退自朝召其子燮曰燮乎吾聞之干人
之怒必獲毒焉夫郤子之怒甚矣不逞諸齊必發諸晉
國不得政何以逞怒余將致政焉以成其怒無以內易
外也乃老獻子代爲政十一年衛孫桓子魯臧宣叔以
戰敗怒於齊皆來乞師同主於郤獻子公許之七百乘

獻子曰此城濮之賦也有先君之明與先大夫之肅故
捷克於先大夫無能爲役請八百乘許之卻克將中軍
士燮佐上軍欒書將下軍韓厥爲司馬以救魯衛臧宣
叔逆晉師且道之李文子帥師會之及衛地韓獻子將
斬人獻子馳將救之至則既斬之矣獻子使速以徇告
其僕曰吾以分謗也師從齊師于辛六月壬申師至于
靡笄之下齊侯使請戰曰子以君師辱於敝邑不腆敝
賦詰朝請見對曰晉與魯衛兄弟也來告曰大國朝夕

釋憾於敝邑之地寡君不忍使羣臣請於大國無令輿
師淹於君地能進不能退君無所辱命齊侯曰大夫之
許寡人之願也若其不許亦將見也癸酉師陳于鞌邴
夏御齊侯逢丑父爲右晉解張御獻子鄭邱緩爲右齊
侯曰余姑翦此而朝食不介馬而馳之獻子傷於矢流
血及屨未絕鼓音曰余病矣張侯曰自始合而矢貫余
手及肘余折以御左輪朱殷豈敢言病吾子忍之緩曰
自始合苟有險余必下推車子豈識之然子病矣張侯

曰師之耳目在吾旗鼓進退從之此車一人殿之可以集事若之何其以病敗君之大事也擇甲執兵固即死也病未及死吾子勉之左并轡右援枹而鼓馬逸不能止師從之齊師敗績逐之三周華不注韓厥中御而從齊侯幾獲之逢丑父與公易位故免事具韓厥逢丑父傳中齊侯使賓媚人賂以紀甌玉磬與地不可則聽客之所爲賓媚人致賂獻子不可曰必以蕭同叔子爲質而使齊之封內盡東其畝對曰蕭同叔子非他寡君之

母也若以匹敵則亦晉君之母也吾子布大命於諸侯而曰必質其母以爲信其若王命何且是以不孝令也詩曰孝子不匱永錫爾類若以不孝令於諸侯其無乃非德類也乎先王疆理天下物土之宜而布其利故詩曰我疆我理南東其畝今吾子疆理諸侯而曰盡東其畝而已唯吾子戎車是利無顧土宜其無乃非先王之命也乎反先王則不義何以爲盟主其晉實有闕四王之王也樹德而濟同欲焉五霸之霸也勤而撫之以役

王命今吾子求合諸侯以逞無疆之欲詩曰布政優優
百祿是遘子實不優而棄百祿諸侯何害焉不然寡君
之命使臣則有辭矣曰子以君師辱於敝邑不腆敝賦
以犒從者畏君之震師徒撓敗吾子惠徼齊國之福不
泯其社稷使繼舊好唯是先君之敝器土地不敢愛子
又不許請收合餘燼背城借一敝邑之幸亦云從也况
其不幸敢不唯命是聽魯衛諫曰齊疾我矣其死亡者
皆親暱也子若不許讎我必甚唯子則又何求子得其

國寶我亦得地而紓於難其榮多矣齊晉亦唯天所授
豈必在晉獻子許之使對曰羣臣帥賦輿以爲魯衛請
若苟有以藉口而復於寡君君之惠也敢不唯命是聽
秋七月晉師及齊國佐盟于袁婁使齊人歸魯汶陽之
田魯成公會晉師于上鄆賜三帥先路三命之服師至
獻子見公曰子之力也夫對曰君之訓也二三子之力
也臣何力之有焉范叔見勞如卻伯對曰庚所命也克
之制也燮何力之有焉欒伯見公亦如之對曰燮之詔

也士用命也書何力之有焉明年齊侯朝于晉將授玉
獻子趨進曰此行也君爲婦人之笑辱也寡君未之敢
任獻子卒樂書爲政

卻至晉卿也爲溫大夫亦曰溫季厲公元年卻至與周
爭郕田王命劉康公單襄公訟諸晉卻至曰溫吾故也
故不敢失劉子單子曰昔周克商使諸侯撫封蘇忿生
以溫爲司寇與檀伯達封于河蘇氏即狄又不能於狄
而奔衛襄王勞文公而賜之溫狐氏陽氏先處之而後

及子若治其故則王官之邑也子安得之公使卻至勿
敢爭二年如楚聘且莅盟楚子享之子反相爲地室而
縣焉卻至將登金奏作於下驚而走出子反曰日云莫
矣寡君須矣吾子其入也至曰君不忘先君之好施及
下臣貺之以大禮重之以備樂如天之福兩君相見何
以代此下臣不敢子反曰如天之福兩君相見無亦唯
是一矢以相加遺焉用樂寡君須矣吾子其入也賓曰
若讓之以一矢則禍之大者其何福之爲世之治也諸

侯間於天子之事則相朝也於是乎有享宴之禮享以訓恭儉宴以示慈惠恭儉以行禮而慈惠以布政政以禮成民是以息百官承事朝而不夕此公侯之所以扞城其民也故詩曰赳赳武夫公侯扞城及其亂也諸侯貪冒侵欲不忌爭尋常以盡其民略其武夫以爲己腹心股肱爪牙故詩曰赳赳武夫公侯腹心天下有道則公侯能爲民扞城而制其腹心亂則反之今吾子之言亂之道也不可以爲法然吾子主也至敢不從遂入卒

事歸以語范文子文子曰無禮必食言吾死無日矣六年與卻犇卻錡謀害伯宗譖而殺之及欒弗忌伯州犂奔楚韓厥曰卻氏其不免乎善人天地之紀也而驟絕之不亡何待七年卻至佐新軍從欒書伐鄭濟河聞楚師將至范文子不欲戰卻至不可樂書曰楚人輕窕固壘而待之三日必退退而擊之必勝卻至曰楚有六間不可失也其二卿相惡王卒以舊鄭陳而不整蠻軍而不陳陳不遠晦在陳而囂合而加囂各顧其後莫有鬪

心舊不必良以犯天忌我必克之師遂出戰于鄢陵卻至三遇楚子之卒見楚子必下免胄而趨風楚子使工尹襄問之以弓曰方事之殷也有秣韋之跗

方干反

注君

子也識見不穀而趨無乃傷乎卻至見客免胄承命曰君之外臣至從寡君之戎事以君之靈間蒙甲冑不敢拜命敢告不寧君命之辱爲事之故敢肅使者三肅使者而退既又從鄭伯其右弗翰胡曰諜輅之余從之乘而俘以下卻至曰傷國君有刑乃止楚師薄於險遂敗

囚楚公子茂以歸公使卻至獻楚捷于周與單襄公語
驟稱其伐單子語諸大夫曰溫季其亡乎立於七人之
下而求掩其上怨之聚亂之本也多怨而階亂何以在
位夏書曰怨豈在明不見是圖將慎其細也今而明之
其可乎厲公反自鄢陵既侈遂多外嬖欲盡去羣大夫
而立其左右方是時胥童以胥克之廢也怨卻氏而嬖
於公卻錡奪夷陽五田五亦嬖於公卻犇與長魚矯爭
田執而梏之與其父母妻子同一轅既矯亦嬖於公樂

書怨郤至以其不從己而敗楚師也欲廢之使楚公子
茂告公曰此戰也郤至實召寡君以東師之未至也與
軍帥之不具也曰此必敗吾因奉孫周以事君公以告
欒書書曰其有焉不然豈其死之不恤而受敵使乎君
盍嘗使諸周而察之郤至聘于周欒書使孫周見之公
使覘之信遂怨郤至七年厲公田與婦人先殺而飲酒
後使大夫殺郤至奉豕寺人孟張奪之郤至射而殺之
公曰季子欺予厲公將作難胥童曰必先三郤族大多

怨去大族不逼敵多怨有庸公曰然郤氏聞之郤錡欲
攻公曰雖死君必危郤至曰人所以立信知勇也信不
叛君知不害民勇不作亂失茲三者其誰與我死而多
怨將安用之君實有臣而殺之其謂君何我之有罪吾
死後矣若殺不辜將失其民欲安得乎待命而已受君
之祿是以聚黨有黨而爭命罪孰大焉公使胥童夷羊
五帥甲八百將攻郤氏長魚矯請無用衆公使清沸魋
助之抽戈結袵而僞訟者三郤將謀於榭矯以戈殺駒

伯苦成叔於其位溫季曰逃威也遂趨矯及諸其車以
戈殺之皆尸諸朝

士武子會字季食邑於隨及范故稱隨季或稱范季焉
文公時武子尚少城濮之戰晉中軍風于澤亡大旆之
左旃祁瞞干命司馬殺之以徇于諸侯使茅蔑代之師
還濟河舟之僑先歸武子攝右振旅愷以入于晉獻俘
授馘飲至大賞徵會討貳殺舟之僑以徇于國民於是
大服武子與謀焉襄公卒靈公少晉人以難故欲立長

君趙孟謀立公子雍使先蔑及武子如秦逆雍將還穆
嬴日抱太子以哭于朝趙孟患之乃背先蔑立靈公以
禦秦師潛師夜起敗秦師于令狐至于刳首先蔑奔秦
武子從之武子在秦三年不見先蔑其人曰能亡人於
國不能見於此焉用之武子曰吾與之同罪非義之也
將何見焉靈公六年秦伯伐晉取羈焉趙盾禦之史駢
曰秦不能久請深壘固軍以待之從之秦人欲戰秦伯
謂武子曰若何而戰對曰趙氏新出其屬曰史駢必實

爲此謀將以老我師也趙有側室曰穿晉君之壻也有寵而弱不在軍事好勇而狂且惡史駢之佐上軍也若使輕者肆焉其可秦伯以璧祈戰于河十二月戊午秦師掩晉上軍上軍不動趙穿追之不及反怒曰裏糧坐甲固敵是求敵至不擊將何俟焉軍吏曰將有待也穿曰我不知謀將獨出乃以其屬出趙盾曰秦獲穿也獲一卿矣秦以勝歸我何以報乃皆出戰交綏秦行人夜戒晉師曰兩君之士皆未憖也明日請相見也史駢曰

使者目動而言肆懼我也將遁矣薄諸河必敗之胥甲
趙穿當軍門呼曰死傷未收而棄之不惠也不待期而
薄人於險無勇也乃止秦師夜遁侵晉入瑕而還七年
晉使詹嘉處瑕以守桃林之塞始患秦之用士會也夏
六卿相見於諸浮趙盾曰隨會在秦賈季在狄難日至
矣若之何中行桓子曰請復賈季能外事且由舊勲卻
成子曰賈季亂且罪大不如隨會能賤而有恥柔而不
犯其知足使也且無罪乃使魏壽餘偽以魏叛者以誘

士會執其帑於晉使夜逸請自歸于秦秦伯許之履武子之足於朝秦伯師于河西魏人在東壽餘曰請東人之能與夫二三有司言者吾與之先使武子武子辭曰晉人虎狼也若背其言臣死妻子爲戮無益於君不可悔也秦伯曰若背其言所不歸爾帑者有如河乃行繞朝贈之以策曰子無謂秦無人吾謀適不用也既濟魏人譟而還秦人歸其帑其處者爲劉氏靈公失道趙盾患之將諫武子曰諫而不入則莫之繼也會請先不入

則子繼之三進及溜而後視之曰吾知所過矣將改之
稽首而對曰人誰無過過而能改善莫大焉詩曰靡不
有初鮮克有終夫如是則能補過者鮮矣君能有終則
社稷之固也豈惟羣臣賴之又曰衮職有闕惟仲山甫
補之能補過也君能補過衮不廢矣景公三年楚莊王
圍鄭荀林父帥師救鄭鄭楚已平桓子欲還武子曰善
會聞用師觀釁而動德刑政事典禮不易不可敵也不
爲是征楚君討鄭怒其貳而哀其卑叛而伐之服而舍

之德刑成矣昔歲入陳今茲入鄭民不罷勞君無怨讟
政有經矣荆尸而舉商農工賈不敗其業而卒乘輯睦
事不奸矣爲教爲宰釋楚國之令典軍行右轅左追蓐
前茅慮無中權後勁百官象物而動軍政不戒而備能
用典矣其君之舉也內姓選於親外姓選於舊舉不失
德賞不失勞老有加惠旅有施舍君子小人物有服章
貴有常尊賤有等威禮不逆矣德立刑行政成事時典
從禮順若之何敵之見可而進知難而退軍之善政也

兼弱攻昧武之善經也子姑整軍而經武乎猶有弱而
昧者何必楚仲虺有言曰取亂侮亡兼弱也洵曰於鑠
王師遵養時晦者昧也武曰無競惟烈撫弱者昧以務
烈所可也先穀曰不可乃以中軍佐濟晉師從之果敗
于邲七年春武子帥師滅赤狄甲氏及留吁鐸辰三月
獻狄俘景公請于王戊申以散冤命武子將中軍且爲
太傅於是晉國之盜逃奔於秦羊舌職曰吾聞之禹稱
善人不善人遠此之謂也夫詩曰戰戰兢兢如臨深淵

如履薄冰善人在上也善人在上則無幸民諺曰民之多幸國之不幸也是無善人之謂也冬晉侯使武子平王室定王享之原襄公相禮殺烝武子私問其故王聞之召武子曰季氏而弗聞乎王享有體薦宴有折俎公當享卿當宴王室之禮也武子歸而講求典禮以修晉國之法卻克之怒齊也誓欲報之還請伐齊公弗許武子將老召其子燮曰燮乎吾聞之喜怒以類者鮮易者實多詩曰君子如怒亂庶遄沮君子如祉亂庶遄已君

子之喜怒以已亂也弗已必益之郤子其或者欲已亂於齊乎不然余懼其益之也余將老使郤子逞其志庶有豸乎爾從二三子惟敬乃請老郤獻子爲政文子退朝而暮武子曰何暮也對曰有秦客廋辭於朝大夫莫之對也吾知三焉武子怒曰大夫非不能也讓父兄也爾童子而三掩衆於朝吾不在晉國亡無日矣擊之以杖郤子伐齊師勝而返文子後入武子曰無爲吾望爾也乎對曰師有功國人喜以逆之先入必屬耳目焉是

代帥受名也故不敢武子曰吾知免矣故文子爲政有
令名晉國賴之

士文子燮字叔武子告老公以文子爲上軍佐從卻克
敗齊師于鞏景公十七年聘于魯言伐郟以其事吳故
也成公賂之請緩師文子不可曰君命無貳失信不立
禮無加貨事無二成君後諸侯是寡君不得事君也燮
將復之季孫懼使宣伯帥師會伐郟齊侯來朝公使韓
穿言于魯以汶陽之田歸于齊於是諸侯皆貳十八年

晉會諸侯于蒲季文子曰德則不競尋盟何爲文子曰
勤以撫之寬以待之堅彊以御之明神以要之柔服而
伐貳德之次也公觀于軍府見鍾儀問之曰南冠而縶
者誰也有司對曰鄭人所獻楚囚也使稅之召而弔之
再拜稽首問其族對曰伶人也公曰能樂乎對曰先公
之職官也敢有二事使與之琴操南音公曰君王何如
對曰非小人之所能知也固問之對曰其爲太子也師
保奉之以朝于嬰齊而夕于側也不知其他也公以語

文子文子曰楚囚君子也言稱先職不肯本也樂操土
風不忘舊也稱太子抑無私也名其二卿尊君也不背
本仁也不忘舊信也無私忠也尊君敏也仁以接事信
以守之忠以成之敏以行之事雖大必濟君盍歸之使
合晉楚之成公從之重爲之禮使歸求成厲公元年秦
晉爲成將會于令狐厲公先至焉秦桓公不肯涉河次
于王城使史顗盟厲公于河東晉卻欒盟秦桓公于河
西文子曰是盟也何益齊盟所以質信也會所信之始

也始之不從其可質乎秦伯歸而背晉成二年會楚公
子罷許偃盟于宋西門之外厲公既立三郤驕君多欲
文子慮難之將作也欲自弱以致諸侯之師冀其懼而
增德焉六年公將伐鄭文子不可曰若逞吾願諸侯皆
叛晉可以逞若惟鄭叛晉國之憂可立俟也欒書曰不
可以當吾世而失諸侯必伐鄭乃興師楚子救鄭晉師
濟河聞楚師將至文子欲反曰我僞逃楚可以紓憂夫
合諸侯非吾所能也以遺能者我若羣臣輯睦以事君

多矣書曰不可六月晉楚遇於鄢陵文子不欲戰卻至
曰韓之戰惠公不振旅箕之役先軫不反命邲之師荀
林父不復從皆晉之恥也子亦見先君之事矣今我辟
楚又益恥也文子曰吾先君之亟戰也有故秦狄齊楚
皆彊不盡力子孫將弱今三彊服矣敵楚而已唯聖人
能內外無患自非聖人外寧必有內憂盍釋楚以爲外
懼乎甲午晦楚晨壓晉軍而陳軍吏患之士匄趨進曰
塞井夷竈陳於軍中而疏行首晉楚唯天所授何患焉

文子執戈逐之曰國之存亡天也童子何知焉既戰楚師大敗共王中目乃遁晉入楚軍三日穀文子立於君馬之前曰君幼諸臣不佞何以及此君其戒之周書曰惟命不于常有德之謂安知天之不授晉且以勸楚乎文子反自鄢陵使其祝宗祈死曰君驕侈而克敵是天益其疾也難將作矣愛我者惟祝我使我速死無及於難范氏之福也七年六月戊辰士燮卒冬難作始於三郤卒及於公

范宣子勾范文子燮之子也厲公之末年士勾尚幼樂
書謀弑厲公執公以召士勾士勾辭之悼公五年楚子
囊爲令尹宣子曰我喪陳矣楚人討貳而立子囊必改
行而疾討陳陳近於楚民朝夕急能無往乎有陳非吾
事也無之而後可八年宣子聘于魯告將用師于鄭公
享之宣子賦標有梅季武子曰誰敢哉今譬於草木寡
君在君君之臭味也歡以從命何時之有武子賦角弓
將出武子賦彤弓宣子曰城濮之役我先君文公獻功

于衡雍受彤弓于襄王以爲子孫藏也先君守官之嗣也敢不承命君子以爲知禮十年王叔陳生與伯輿爭政王右伯輿王叔陳生怒而出奔及河王復之殺史狡以說焉不入遂處之公使宣子平王室王叔與伯輿訟焉王叔之宰與伯輿之大夫瑕禽坐獄於王庭宣子聽之王叔之宰曰華門圭竇之人而皆陵其上其難爲上矣瑕禽曰昔平王東遷吾七姓從王牲用備具王賴之而賜之駢旒之盟曰世世無失職若華門圭竇其能

來東底乎且王何賴焉今自王叔之相也政以賄成而
刑放於寵官之師旅不勝其富吾能無葦門圭竇乎唯
大國圖之下而無直則何謂正矣宣子曰天子所右寡
君亦右之所左亦左之使王叔與伯輿合要王叔氏不
能舉其契故王叔來奔十三年荀瑩士魴卒悼公蒐于
緜上治兵使士匄將中軍辭曰伯游長昔臣習於智伯
是以佐之非能賢也請從伯游荀偃將中軍士匄佐之
使韓起將上軍辭以趙武又使欒黶辭曰臣不如韓起

韓起願上趙武君其聽之使趙武將上軍韓起佐之欒
黶將下軍魏絳佐之新軍無帥公難其人使其什吏率
其卒乘官屬以從於下軍禮也晉國之民是以大和諸
侯遂睦君子曰讓禮之主也范宣子讓其下皆讓欒黶
爲汰弗敢違也晉國以平數世賴之刑善也夫一人刑
善百姓休和可不務乎書曰一人有慶兆民賴之其寧
惟永其是之謂乎周之興也其詩曰儀刑文王萬邦作
孚言刑善也及其衰也其詩曰大夫不均我從事獨賢

言不讓也世之治也君子尚能而讓其下小人農力以
事其上是以上下有禮而讒慝黜遠由不爭也謂之懿
德及其亂也君子稱其功以加小人小人伐其技以馮
君子是以上下無禮亂虐並生由爭善也謂之昏德國
家之敝恒必由之吳侵楚爲楚所敗十四年吳告敗于
晉晉會諸侯于向爲吳謀楚故也宣子數吳之不德以
退吳人執莒公子務婁以其通於楚也將執戎子駒支
宣子親數諸朝曰來姜戎氏昔秦人迫逐乃祖吾離于

瓜州乃祖吾離被苫蓋蒙荆棘以來歸我先君我先君
惠公有不腆之田與女剖分而食之今諸侯之事我寡
君不如昔者蓋言語漏洩則職汝之由詰朝之事爾無
與焉與將執女對曰昔秦人負恃其衆貪于土地逐我
諸戎惠公蠲其大德謂我諸戎是四嶽之裔胄也母是
翦棄賜我南鄙之田狐狸豺狼所居豺狼所嗥我諸戎除翦
其荆棘驅其狐狸豺狼以爲先君不侵不畔之臣至于
今不貳昔文公與秦伐鄭秦人竊與鄭盟而舍戍焉於

是乎有穀之師晉禦其上戎亢其下秦師不復我諸戎
實然譬如捕鹿晉人角之諸戎掎之與晉路之戎何以
不免自是以來晉之百役與我諸戎相繼于時以從執
政猶穀志也豈有離邊今官之師旅無乃實有所闕以
攜諸侯而罪我諸戎我諸戎飲食衣服不與華同贄幣
不通言語不達何惡之能爲不與於會亦無曹焉賦青
蠅而退宣子辭焉使即事於會成愷悌也是歲也宣子
假羽毛於齊而弗歸齊人始貳平公三年伐齊齊侯禦

諸平陰諸侯之士門焉齊人多死齊侯懼宣子告析文
子曰吾知子敢匿情乎魯人莒人皆請以車千乘自其
鄉入既許之矣若入君必失國子盍圖之子家以告公
公恐晏嬰曰君固無勇而又聞是弗能久矣齊師夜遁
四年荀偃卒宣子爲政侵齊及穀聞喪而還於四月丁
未鄭公孫蠆卒赴於晉大夫宣子言於公以其善於伐
秦也六月公請於王王追賜之大路使以行禮也欒桓
子娶於范宣子生懷子桓子嘗逐范鞅鞅以其亡也怨

欒氏故與欒盈爲公族大夫而不相能桓子卒欒祁與其老州賔通幾亡室矣懷子患之祁懼其討也愬諸宣子曰盈將爲亂以范氏爲死桓子而專政矣曰吾父逐鞅也不怒而以寵報之又與吾同官而專之吾父死而益富死吾父而專於國有死而已吾蔑從之矣其謀如是懼害於主吾不敢不言范鞅爲之徵懷子好施士多歸之宣子畏其多士也信之懷子爲下卿六年宣子使城著而遂逐之秋欒盈出奔楚宣子殺箕遺黃淵嘉父

司空靖邴豫董叔邴師申書羊舌虎叔羆而囚伯華叔

向籍偃知起中行喜州綽邢蒯出奔齊皆樂氏之黨也

樂王鮒謂宣子曰盍反州綽邢蒯勇士也宣子曰彼樂

氏之勇也余何獲焉王鮒曰子爲彼樂氏則亦子之勇

也樂盈自楚適齊八年齊人潛內樂盈于曲沃盈率曲

沃之甲因魏獻子以晝入絳樂王鮒侍坐於宣子或告

曰樂氏至矣宣子懼王鮒曰奉君以走固宮必無害矣

且樂氏多怨子爲政樂氏自外子在位其利多矣既有

利權又執民柄將何懼焉欒氏所得其唯魏氏乎而可
彊取也夫克亂在權子無懈矣公有姻喪王鮒使宣子
墨緣冒經二婦人輦以如公奉公以如固宮范鞅逆魏
舒則成列既乘將逆欒氏矣趨進曰欒氏帥賊以入鞅
之父與二三子在君所矣使鞅逆吾子鞅請驂乘持帶
遂超乘右撫劔左授帶命驅之出僕請鞅曰之公宣子
逆諸階執其手賂之以曲沃初斐豹隸也著於丹書欒
氏之力臣曰督戎國人懼之斐豹謂宣子曰苟焚丹書

我殺督戎宣子喜曰而殺之所不請於君焚丹書者有
如日乃出豹而閉之督戎從之踰隱而待之督戎踰入
豹自後擊而殺之范氏之徒在臺後欒氏乘公門宣子
謂鞅曰矢及君屋死之鞅用劒以帥卒欒氏退攝車從
之遇欒樂曰樂免之死將訟女於天樂射之不中又注
則乘槐本而覆或以戟鉤之斷肘而死欒魴傷欒盈奔
曲沃宣子使圍之既克盡殺欒氏之族黨欒魴出奔宋
宣子卒趙武代之

范獻子鞅宣子勾之子也悼公十四年晉師伐秦至于
械林荀偃爲中軍帥令于軍欒黶將下軍惡偃之專也
先率其屬以歸軍師不和偃懼敗乃命大還欒黶之弟
鍼爲戎右曰此役也報櫟之敗也役又無功晉之恥也
吾有二位於戎路敢不恥乎與士鞅馳秦師死焉士鞅
反欒黶謂士勾曰余弟不欲往而子召之余弟死而子
來是而子殺余之弟也弗逐余亦將殺之士鞅奔秦秦
伯問士鞅曰晉大夫其誰先亡對曰其欒氏乎秦伯曰

以其汰乎對曰然欒黶汰虐已甚猶可以免其在盈乎
秦伯曰何故對曰武子之德在民如周人之思召公焉
愛其甘棠況其子乎欒黶死盈之善未能及人武子所
施沒矣而黶之怨實章於是乎在秦伯以爲知言爲之
請於晉而復之既歸怨欒氏故與欒盈爲公族大夫而
不相能宣子之逐盈也鞅實啓之盈入而敗則亦鞅之
力也平公二十一年魯昭公來朝莒人愬昭公于晉公
欲止之范獻子曰不可人朝而執之誘也討不以師而

誘以成之情也爲盟主而犯此二者無乃不可乎請歸之間而以師討焉公從之二十三年獻子如衛弔且反戚田頃公十一年晉會諸侯于扈謀納魯昭公宋衛固以爲請獻子取貨於季孫謂司城子梁與北宮貞子曰季孫未知其罪而君伐之請囚請亡於是乎不獲君又弗克而自出也夫豈無備而能出君乎季氏之復天救之也休公徒之怒而啟叔孫氏之心不然豈其伐人而脫甲執冰以游叔孫氏懼禍之濫而自同於季氏天之

道也魯君守齊三年而無成季氏甚得其民淮夷與之
有十年之備有齊楚之援有天之贊有民之助有堅守
之心有列國之權而弗敢宣也事君如在國故鞅以爲
難二子皆圖國者也而欲納魯君鞅之願也請從二子
以圍魯無成死之二子懼皆辭乃辭小國而以難復定
公三年魏子合諸侯之大夫于狄泉遂田于大陸還卒
於甯范獻子爲政去其柏椽以其未復命而田也

趙成子衰字子輿其先造父事周穆王封於趙城故以

爲氏造父七世孫叔帶始入晉事文侯叔帶五世爲趙
夙獻公使爲將滅耿滅霍滅魏賜趙夙耿夙生共孟共
孟生成子成子事獻公之子重耳驪姬之難成子從公
子出奔狄居狄十二年從公子去狄適齊自齊適楚是
時晉惠公卒秦穆公召公子於楚將納之成子從公子
入秦秦穆公歸公子女五人懷嬴與焉公子以懷嬴經
爲子圉妻也將辭焉問於成子成子對曰禮志有之將
有請於人必先有入焉欲人之愛己也必先愛人欲人

之從已也必先從人無德於人而求用於人罪也今將
婚媾以從秦受好以愛之聽從以德之懼其未可也又
何疑焉公子乃歸女而納幣且逆之他日穆公將享公
子公子使子犯從子犯曰吾不如衰之文也請使衰從
使成子從穆公享公子如享國君之禮成子相如賓公
子賦河水公賦六月成子曰重耳拜賜公子降拜稽首
公降一級而辭焉成子曰君稱所以佐天子者命重耳
重耳敢不拜穆公納公子於晉是爲文公文公之二年

受原於周而難其守問於寺人勃鞞對曰昔趙衰以壺
飧從徑餒而弗食公以成子爲原大夫四年公將蒐于
被廬作三軍謀元帥成子曰卻縠可臣亟聞其言矣說
禮樂而敦詩書詩書義之府也禮樂德之則也德義利
之本也夏書曰賦納以言明試以功車服以庸君其試
之公從之使卻縠將中軍以成子爲卿成子辭曰欒枝
貞慎先軫有謀胥臣多聞皆可以爲輔佐臣弗如也乃
使欒枝將下軍先軫佐之取五鹿先軫之謀也卻縠卒

使先軫代之胥臣將下軍公使成子爲卿辭曰夫三德者偃之出也以德紀民其章大矣不可廢也使狐偃爲卿辭曰毛之智賢於臣其齒又長毛也不在位不敢聞命乃使狐毛將上軍狐偃佐之狐毛卒使成子代之辭曰城濮之役先且居之佐軍也善軍伐有賞善軍有賞能其官有賞且居有三賞不可廢也且臣之倫箕鄭胥嬰先都在乃使且居將上軍公曰趙衰三讓其所讓皆社稷之衛也廢讓是廢德也以成子之故蒐于清原作

五軍使成子將新上軍箕鄭佐之嬰將新下軍先都佐之子犯卒蒲城伯請佐公曰夫趙衰三讓不失義讓推賢也義廣德也德廣賢至又何患矣請令衰也從子乃使成子佐上軍五年而成子卒

趙宣子盾成子之子也成子從文公在狄狄人伐廬咎如獲其二女叔隗季隗而納諸文公文公取季隗而以叔隗妻成子生盾成子居晉時取文公女曰趙姬生原同屏括樓嬰及從文公反國趙姬請盾與其母成子辭

姬曰得寵而忘舊何以使人必逆之固請許之來以盾
爲才固請于公以爲適子而使其三子下之以叔隗爲
內子而已下之成子卒宣子將中軍始爲國政制事典
正法罪辟刑獄董逋逃由質要治舊滂本秩禮續常職
出滯淹既成以授太傅陽處父太師賈佗使行諸晉國
以爲常法襄公卒太子夷臯少晉人以難故謀立長君
宣子欲立公子雍曰雍好善而長其母杜祁以君故讓
偏姑而上之以狄故讓季隗而已次之先君以是愛其

子而仕諸秦爲亞卿焉秦大而近母義子愛足以威民
立之不亦可乎使先蔑士會如秦逆公子雍秦康公以
兵送之將入穆嬴日抱太子以啼于朝曰將焉寘此出
朝則抱以適趙氏頓首言於宣子曰先君屬是子於子
也言猶在耳其忍棄之宣子畏偏乃背先蔑以禦秦師
箕鄭居守宣子將中軍先克佐之荀林父將上軍先蔑
將下軍先都佐之步招御戎戎津爲右及董陰宣子曰
我若受秦秦則實也不受寇也既不受矣而復緩師秦

將生心先人有奪人之心軍之善謀也逐寇如追逃軍之善政也訓卒利兵秣馬蓐食潛師夜起遂敗秦師于令狐至于刳首先幾奔秦士會從之師還太子即位是爲靈公靈公元年狄人侵魯魯使告于晉宣子使因賈季問狄相酈舒且讓之酈舒問於賈季曰趙衰趙盾孰賢對曰趙衰冬日之日也趙盾夏日之日也二年宣子會諸侯之大夫盟于衡雍六年秦以令狐之役來伐取羈馬宣子禦之從秦師于河曲秦師夜遁初邾文公元

妃齊姜生定公二妃晉姬生提菑文公之卒也邾人立定公提菑奔晉八年宣子以諸侯之師八百乘納提菑于邾邾人辭曰齊出獲且長宣子曰辭順而弗從不祥乃還十三年楚莊王及鄭人侵陳遂侵宋宣子帥師救陳宋會于裴林於是靈公侈宣子驟諫而不入故不競於楚靈公不君患宣子使鉏麇賊之晨往寢門闢矣盛服將朝尚早坐而假寐麇退數而言曰不忘恭敬民之主也賊民之主不忠棄君之命不信有一於此不如死

也觸槐而死十五年公飲宣子酒伏甲將攻之其右提
彌明知之趨登曰臣侍君宴過三爵非禮也遂扶以下
公嗾夫獒焉明搏而殺之宣子曰棄人用犬雖猛何爲
鬪且出提彌明死之初宣子田于首山舍于翳桑見靈
輒餓問其病曰不食三日矣食之舍其半問之曰宦三
年矣未知母之存否今近焉請以遺之使盡之而爲之
簞食與肉寘諸橐以與之既而與爲公介倒戟以禦公
徒而免之問何故對曰翳桑之餓人也問其名居不告

而退遂自亡也宣子出奔趙穿自後攻公於桃園弑之
穿宣子從父昆弟之子也宣子聞難未出山而復太史
董狐書曰趙盾弑其君宣子曰不然對曰子爲正卿亡
不越境反不討賊非子而誰宣子曰烏乎我之懷矣自
詒伊戚其我之謂乎宣子使趙穿逆公子黑臀于周而
立之是爲成公晉自驪姬之難詛無畜羣公子自是晉
無公族成公立乃宦卿之適而爲之田以爲公族又宦
其餘子亦爲餘子其庶子爲公行晉於是有公族餘子

公行宣子請以括爲公族曰君姬氏之愛子也微君姬氏則臣狄人也公許之以宣子爲旄車之族使屏季以其故族爲公族大夫宣子卒卻缺爲政

趙文子武莊子朔之子而宣子盾之孫也莊子爲下軍將早卒趙嬰齊通于莊姬原同屏季放之景公十七年莊姬以趙嬰之亡也譖於公曰原屏將爲亂欒卻爲徵公討趙氏殺趙同趙括文子從姬氏畜于公宮故免公以其田與祁奚韓厥言於公曰成季之勲宣孟之忠而

無後爲善者其懼矣三代之令王皆數百年保天之祿
夫豈無辟王賴前哲以免也周書曰不敢侮鰥寡所以
明德也乃立武而反其田焉

此與史記趙世家所載異當以春秋為主

後二

年景公夢大厲被髮及地搏膺而踊曰殺余孫不義余
得請於帝矣壞大門及寢門而入公懼入于室又壞戶
公覺召桑田巫巫言如夢公曰何如曰不食新矣是歲
景公卒大厲者趙氏之先也悼公立使文子爲卿十三
年爲上軍帥平公十一年代范宣子爲政文子令薄諸

侯之幣而重其禮魯叔孫穆叔見之謂穆叔曰自今以
往兵其少弭矣齊崔慶新得政將求善於諸侯武也知
楚令尹若敬行其禮道之以文辭以靖諸侯兵可以弭
矣十三年文子及楚令尹子木合諸侯之大夫盟于宋
弭兵也鄭簡公享文子于垂隴子展伯有子西子產子
大叔二子石從文子曰七子從君以寵武也請皆賦以
卒君貺武亦以觀七子之志子展賦草蟲文子曰善哉
民之主也抑武也不足以當之伯有賦鶉之賁賁文子

曰牀第之言不踰閭況在野乎非使人之所得聞也子
西賦黍苗之四章文子曰寡君在武何能焉子產賦隰
桑文子曰武請受其卒章子大叔賦野有蔓草文子曰
吾子之惠也印段賦蟋蟀文子曰善哉保家之主也公
孫段賦桑扈文子曰匪交匪敖福將焉往若保是言也
欲辭福祿得乎卒享文子告叔向曰伯有將爲戮矣詩
以言志志認其上而公怨之以爲賓榮其能久乎幸而
後亡叔向曰然已侈所謂不及五稔者夫子之謂矣文

子曰其餘皆數世之主也子展其後亡者也在上不忘
降印氏其次也樂而不荒樂以安民不淫以使之後亡
不亦可乎楚子木卒文子喪之如同盟君子以爲知禮
十五年悼公之夫人食輿人之城杞者絳縣人或年長
矣無子而往與於食有與疑年使之年曰臣小人也
不知紀年臣生之歲正月甲子朔四百有四十五甲子
矣其季於今三之一也吏走問諸朝師曠曰魯叔仲惠
伯會卻成子于承匡之歲也是歲也狄伐魯叔孫莊叔
於

是乎敗狄于鹹獲長狄僑如及虺也豹也而皆以名其子七十三年矣史趙曰亥有二首六身下二如身是其日數也士文伯曰然則二萬二千六百有六旬也文子問其縣大夫則其屬也召之而謝過焉曰武不才任君之大事以晉國之多虞不能由吾子使吾子辱在泥塗久矣武之罪也敢謝不才遂仕之使助爲政辭以老與之田使爲君復陶以爲絳縣師而廢其輿尉於是魯使者晉歸以語諸大夫季武子曰晉未可媮也有趙孟

以爲大夫有伯瑕以爲佐有史趙師曠而咨度焉有叔
向女齊以師保其君其朝多君子其庸可媿乎勉事之
而後可是歲文子會諸侯之大夫于澶淵魯穆叔至自
會謂孟孝伯曰趙孟將死矣其語偷不似民主且年未
盈五十而諄諄焉如八九十者弗能久矣十七年文子
及楚令尹子圍尋宋之盟會諸侯之大夫于虢宋之盟
也楚人先軟子木復衷甲焉文子不與之競及是祁午
謂文子曰宋之盟楚人得志於晉今令尹之不信諸侯

之所聞也子弗戒懼又如宋子木之信稱於諸侯猶詐
晉而駕焉況不信之尤者乎楚重得志於晉晉之耻也
子相晉國以爲盟主於今七年矣再合諸侯三合大夫
服齊狄寧東夏平秦亂城淳于師徒不煩國家不罷民
無謗讟諸侯無怨天無大災子之力也有令名矣而終
之以耻午也是懼吾子不可以不戒文子曰武受賜矣
然宋之盟子木有禍人之心武有仁人之心是楚所以
駕於晉也今武猶是心也楚又行僭非所害也武將信

以爲本循而行之譬如農夫是穰是莠雖有饑饉必有
豐年且吾聞之能信不爲人下吾未能也詩曰不僭不
賊鮮不爲則信也能爲人則者不爲人下矣吾不能是
難楚不爲患令尹享文子賦大明之首章文子賦小宛
之二章文子謂叔向曰令尹自以爲王矣文子歸及魯
叔孫曹大夫過鄭鄭伯兼享之子皮戒文子禮終文子
賦瓠葉子皮遂戒穆叔且告之穆叔曰趙孟欲一獻子
其從之子皮曰敢乎穆叔曰夫人之所欲也又何不敢

及享具五獻之籩豆於幕下文子辭私於子產曰武請
於冢宰矣乃用一獻文子爲客禮終乃宴穆叔賦鵲巢
文子曰武不堪也又賦采芣曰小國爲繁大國省穡而
用之其何實非命子皮賦野有死麕之卒章文子賦常
棣且曰吾兄弟比以安危也可使無吠穆叔子皮及曹
大夫興拜舉兕爵曰小國賴子知免於戾矣飲酒樂文
子出曰吾不復此矣天王使劉定公勞文子於潁館於
雒汭劉子曰美哉禹功明德遠矣微禹吾其魚乎吾與

子弁冕端委以治民臨諸侯禹之力也子盍亦遠績禹
功而大庇民乎對曰老夫罪戾是懼焉能恤遠吾儕偷
食朝不謀夕何其長也劉子歸以語王曰諺所謂老將
知而耄及之者其趙孟之謂乎爲晉正卿以主諸侯而
儕於隸人朝不謀夕棄神人矣神怒民叛何以能久趙
孟不復年矣神怒不歆其祀民叛不即其事祀事不從
又何以年秦景公之弟鍼曰后子奔晉見文子文子曰
吾子其曷歸對曰鍼懼選於寡君是以在此將待嗣君

文子曰秦君何如對曰無道文子曰亡乎對曰何爲亡
世無道國未艾也國與天地有與立焉不數世淫弗能
斃也文子曰天乎對曰有焉文子曰其幾何對曰鉞聞
之國無道而年穀和熟天贊之也鮮不五稔文子視蔭
曰朝夕不相及誰能待五后子出而告人曰趙孟將死
矣主民翫歲而愒日其與幾何是歲平公疾求醫於秦
秦景公使醫和視之曰疾不可爲也是謂近女室疾如
蠱非鬼非食惑以喪志良臣將死天命不祐文子問之

曰良臣孰謂對曰主是謂矣語具醫和傳中冬十二月
晉既烝文子適南陽將會孟子餘甲辰朔烝于溫庚戌
卒文子嘗與叔譽觀乎九原文子曰死者如可作也吾
誰與歸叔譽曰其陽處父乎文子曰行并植於晉國不
沒其身其知不足稱也其舅犯乎文子曰見利不顧其
君其仁不足稱也我則隨武子乎利其君不忘其身謀
其身不遺其友晉人謂文子爲知人文子其中退然如
不勝衣其言呐呐然如不出諸其口所舉於晉國管庫

之士七十有餘家生不交利死不屬其子焉晉獻文子成室諸大夫發焉張老曰美哉輪焉美哉奐焉歌於斯哭於斯聚國族於斯是全要領以從先大夫於九京也北面再拜稽首君子謂之善頌善禱

趙簡子鞅一名志父景子成之子而文子武之孫也頃公九年簡子會諸侯之大夫于黃父令諸大夫曰輸王粟具戍人明年將納王十年遂入敬王于周十三年簡

子及荀寅帥師城汝濱遂賦晉國一鼓鐵以鑄刑鼎著
范宣子所爲刑書仲尼曰晉其亡乎失其度矣夫晉國
將守唐叔之所受法度以經緯其民卿大夫以序守之
民是以能尊其貴貴是以能守其業貴賤不愆所謂度
也文公是以作執秩之官爲被廬之法以爲盟主今棄
是度也而爲刑鼎民在鼎矣何以尊貴貴何業守貴賤
無序何以爲國且夫宣子之刑夷之蒐也晉國之亂制
也若之何以爲法蔡史墨曰范氏中行氏其亡乎中行

寅爲下卿而干上令擅作刑器以爲國法是法姦也又
加范氏焉易之亡也其及趙孟趙孟與焉然不得已若
德可以免定公十一年魯季氏之臣陽虎作亂奔晉簡
子受之仲尼曰趙氏其世有亂乎十二年簡子帥師圍
衛衛人貢五百家命置之邯鄲明年簡子謂邯鄲大夫
午曰歸我衛貢吾將移之晉陽午不用命簡子殺午圍
邯鄲荀寅范吉射親於午將攻趙氏董安于聞之告簡
子曰先備諸簡子曰晉國有命始禍者死爲後可也安

于曰與其害於民寧我獨死請以我說簡子不可既而
范氏中行氏伐趙氏之宮簡子奔晉陽晉人圍之知文
子言於公曰君命大臣始禍者死載書在河今三臣首
禍而鞅獨逐刑其頗焉請并逐寅與吉射於是荀躒韓
不信魏曼多奉公以伐范中行氏不克二子遂伐公國
人助公二子敗奔朝歌韓魏請趙氏於公公許之簡子
入于絳知文子之嬖梁嬰父惡董安于言於文子曰不
殺安于使終爲政於趙氏趙氏必得晉國盍以其先發

難也討於趙氏文子使告簡子曰范中行氏雖信爲亂
安于則發之是安于與謀亂也晉國有命始禍者死二
子既伏其辜矣敢以告簡子患之安于曰我死而晉國
寧趙宗定將焉用生人誰不死吾死莫矣乃縊而死簡
子尸諸市而告於知氏曰主命戮罪人安于既伏其罪
矣敢以告知伯從簡子盟而後趙氏定祀安于於廟初
衛靈公之太子蒯聵得罪於靈公之夫人南子出奔于
晉靈公卒蒯聵之子輒立爲君十九年夏六月簡子帥

師納蒯聵于戚宵迷陽虎曰右河而南必至焉使太子
統八人衰經僞自衛逆者告於門哭而入遂居之秋八
月齊人輸范氏粟鄭子姚子般送之士吉射逆之簡子
禦之遇於戚陽虎曰吾車少以兵車之旆與罕駟兵車
先陳罕駟自後隨而從之彼見吾貌必有懼心於是乎
會之必大敗之卜戰龜焦樂丁曰爰始爰謀爰契我龜
謀協以故兆詢可也簡子誓曰范氏中行氏反易天明
斬艾百姓欲擅晉國而滅其君寡君恃鄭而保焉今鄭

爲不道棄君助臣二三子順天明從君命經德義除詬
耻在此行也克敵者上大夫受縣下大夫受郡士田十
萬庶人工商遂人臣隸圉免志父無罪君實圖之若其
有罪絞縊以戮桐棺三寸不設屬辟素車樸馬無入于
兆下卿之罰也將戰郵無恤御簡子衛太子爲右登鐵
上望見鄭師衆太子懼自投于車下子良授太子綏而
乘之曰婦人也簡子巡列曰畢萬匹夫也七戰皆獲有
馬百乘死於牖下羣子勉之死不在寇繁羽御趙羅宋

勇爲右羅無勇麋之吏詰之御對曰疢作而伏衛太子
禱曰曾孫蒯瞶敢昭告皇祖文王烈祖康叔文祖襄公
鄭勝亂從晉午在難不能治亂使鞅討之蒯瞶不敢自
佚備持矛焉敢告無絕筋無折骨無面傷以集大事無
作三祖羞大命不敢請佩玉不敢愛鄭人擊簡子中肩
斃于車中獲其蠡旗太子救之以戈鄭師比獲溫大夫
趙羅太子復伐之鄭師大敗獲齊粟千車簡子喜曰可
矣傳僂曰雖克猶有知在憂未艾也初周人與范氏田

公孫尨稅焉趙氏得而獻之吏請殺之簡子曰為其主也何罪止而與之田及鐵之戰以徒五百人宵攻鄭師取蠶旗於子姚之幕下獻曰請報主德追鄭師姚般公孫林殿而射前列多死簡子曰國無小既戰簡子曰吾伏弢嘔血鼓音不衰今日我上也太子曰吾救主於車退敵於下我右之上也郵良曰我兩靽將絕吾能止之我御之上也駕而乘材兩靽皆絕三十年公會吳王夫差于黃池及盟吳晉爭先吳人曰於周室我為長晉人

曰於姬姓我爲伯簡子呼司馬寅曰日旰矣大事未成
二臣之罪也建鼓整列二臣死之長幼必可知也對曰
請姑視之反曰肉食者無墨今吳王有墨國勝乎太子
死乎且夷德輕不忍久請少待之乃先晉人於是越人
敗吳師獲其太子友夫差歸及越平衛太子自戚入于
衛是爲莊公簡子使告于衛曰君之在晉也志父爲主
請君若太子來以免志父不然寡君其曰志父之爲也
莊公辭以難太子又使栾之三十四年簡子圍衛齊國

觀陳瓘救衛得晉人之致師者子玉使服而見之曰國
子實執齊柄而命瓘曰無辟晉師豈敢廢命子又何辱
簡子曰我卜伐衛未卜與齊戰乃還是歲冬簡子復伐
衛入其郛將入城簡子曰止叔向有言曰怙亂滅國者
無後衛人出莊公而與晉平簡子立襄公之孫般師而
還三十七年簡子卒

趙襄子無恤簡子之子其母翟婢也簡子有太子伯魯
而無恤賢疑所立乃書訓戒之辭於二簡以授二子曰

謹識之三年而問之伯魯不能舉其辭求其簡已失之
矣問無恤誦其辭甚習求其簡出諸袖中而奏之於是
簡子以無恤爲能立以爲後簡子卒定公三十七年越
圍吳襄子降於喪食楚隆曰三年之喪親暱之極也主
又降之無乃有故乎襄子曰黃池之役先王與吳王有
質曰好惡同之今越圍吳嗣子不廢舊業而敵之非晉
之所能及也吾是以爲降楚隆曰若使吳王知之若何
襄子曰可乎隆曰請嘗之乃往先造于越軍曰吳犯間

上國多矣聞君親討焉諸夏之人莫不欣喜唯恐君志之不從請入視之許之告于吳王曰寡君之老無恤使陪臣隆敢展謝其不共黃池之役君之先臣志父得承齊盟曰好惡同之今君在難無恤不敢憚勞非晉國之所能及也使陪臣敢展布之王拜稽首曰寡人不佞不能事越以爲大夫憂拜命之辱與之一簞珠使問襄子曰句踐將生憂寡人寡人死之不得矣王曰溺人必笑吾將有問也史黯何以得爲君子對曰黯也進不見惡

退無謗言王曰宜哉知襄子荀瑤素惡襄子知伯之伐鄭也將攻門命襄子入之對曰主在此知伯曰惡而無勇何以爲子對曰以能忍耻庶無害趙宗乎知伯不悛襄子由是悉知伯初簡子使尹鐸爲晉陽請曰以爲繭絲乎抑爲保障乎簡子曰保障哉尹鐸損其戶數簡子謂襄子曰晉國有難而無以尹鐸爲少以晉陽爲遠必以爲歸及知伯爲政請地於韓康子康子與之又請地於魏桓子桓子復與之又求蔡皋狼之地於襄子襄子

弗與知伯怒帥韓魏之甲以攻之襄子將出曰吾何走
乎從者曰長子近且城厚完襄子曰民罷力以完之又
斃死以守之其誰與我從者曰邯鄲之倉庫實襄子曰
浚民之膏澤以實之又因而殺之其誰與我其晉陽乎
先主之所屬也尹鐸之所寬也民必和矣乃走晉陽三
家圍而灌之城不沒者三版沉竈產鼃民無叛意知伯
行水魏桓子御韓康子驂乘知伯曰吾乃今知水可以
亡人國也桓子肘康子康子履桓子之跗以汾水可以

灌安邑絳水可以灌平陽也襄子知二子有異志使其臣張孟談潛出見二子曰臣聞之脣亡則齒寒趙亡則韓魏爲之次矣二子乃陰與約爲之期日而遣之於是襄子夜殺守隄之吏而決水灌知伯軍知伯軍亂韓魏翼而擊之襄子將卒犯其前大敗其衆遂殺知伯滅其族而分其地是歲也距春秋凡二十有七年云

荀桓子林父字伯文公時爲戎御文公之五年公作三行以禦狄桓子將中行故別稱荀氏爲中行氏襄公之

卒也太子尚幼趙孟欲立公子雍使先蔑如秦桓子止之曰夫人太子猶在而外求君此必不行子以疾辭若何不然將及攝卿以往可也何必子同官爲僚吾嘗同僚敢不盡心乎弗聽爲賦板之三章又弗聽及亡桓子盡送其帑及其器用財賄於秦曰爲同寮故也靈公十年宋人弑昭公明年桓子會諸侯之大夫伐宋討曰何故弑君猶立文公而還十三年桓子以諸侯之師伐宋宋及晉平宋文公受盟于晉又會諸侯于扈將爲魯討

齊皆取賂而還鄭穆公曰晉不足與也遂受盟于楚成
公四年赤狄伐我圍懷及邢邱公欲伐之桓子曰使疾
其民以盈其貫將可殪也周書曰殪戎殷此類之謂也
景公二年代卻缺爲政楚子圍鄭入自皇門鄭伯請降
楚子許之六月晉師救鄭桓子將中軍先穀佐之士會
將上軍卻克佐之趙朔將下軍欒書佐之趙括趙嬰齊
爲中軍大夫鞏朔趙穿爲上軍大夫荀首趙同爲下軍
大夫韓厥爲司馬及河間鄭既及楚平桓子欲還曰無

及於鄭而勦民焉用之楚歸而動不後士會藥書皆然
之惟先穀不可曰晉所以霸師武臣力也今失諸侯不
可謂力有敵而不從不可謂武由我失霸不如死且成
師以出敵彊而退非夫也命爲軍帥而卒以非夫唯羣
子能我弗爲也以中軍佐濟韓厥謂桓子曰彘子以偏
師陷子罪大矣子爲元帥師不用命誰之罪也失屬亡
帥爲罪已重不如進也事之不捷惡有所分與其專罪
六人同之不猶愈乎師遂濟及戰晉師敗于邲桓子歸

而請死公欲許之士貞子諫曰不可城濮之役晉師三日穀文公猶有憂色左右曰有喜而憂如有憂而喜乎公曰得臣猶在憂未歇也困獸猶鬪況國相乎及楚殺子玉公喜而後可知也曰莫余毒也已晉再克而楚再敗也楚是以再世不競今天或者大警晉也而又殺林父以重楚勝其無乃久不競乎林父之事君也進思盡忠退思補過社稷之衛也若之何殺之夫其敗也如日月之食焉何損於明晉侯使復其位五年晉爲邲故

伐鄭告於諸侯蒐焉而還桓子之謀也曰示之以整使
謀而來鄭人大懼潞子嬰兒之夫人景公之姊也酆舒
爲政而殺之又傷潞子之目六年公使桓子伐之敗赤
狄于曲梁滅潞酆舒奔衛衛人歸諸晉晉人殺之公賞
桓子狄臣千室亦賞士伯以瓜衍之田曰獲狄士子之
功也微子吾喪伯氏矣是歲林父卒子荀庚立

知武子荀瑩知莊子荀首之子而中行桓子林父之季
弟也莊子別食知邑故別稱荀氏爲知氏景公二年邲

之役桓子將中軍莊子爲下軍大夫鄭已服楚桓子欲
還彘子不可莊子曰此師殆哉周易有之在師之臨曰
師出以律否臧凶執事順成爲臧逆爲否衆散爲弱川
壅爲澤有律以如已也故曰律否臧且律竭也盈而以
竭天且不整所以凶也不行之謂臨有帥而不從臨孰
甚焉此之謂矣果遇必敗彘子尸之雖免而歸必有大
咎既濟而戰晉師敗績楚熊負羈囚武子以歸莊子以
其族反之尉武子御下軍之士多從之每射抽矢敢納

諸厨子之房厨子怒曰非子之求而蒲之愛董澤之蒲可勝既乎莊子曰不以人子吾子其可得乎吾不可以苟射故也射連尹襄老獲之遂載其尸射公子穀臣囚之以二者還景公十一年莊子佐中軍欲因鄭而歸王子與襄老之尸以求武子所善鄭皇戌言之于楚王王許之明年歸武子於晉王送之曰子其怨我乎對曰二國治戎臣不才不勝其任以為俘馘執事不以釁鼓使歸就戮君之惠也臣實不才又誰敢怨王曰然則德我

乎對曰二國圖其社稷而求紓其民各懲其忿以相宥也兩釋纍囚以成其好二國有好臣不與及其誰敢德王曰子歸何以報我對曰臣不任受怨君亦不任受德無怨無德不知所報王曰雖然必告不穀對曰以君之靈纍臣得歸骨于晉寡君之以爲戮死且不朽若從君惠而免之以賜君之外臣首首其請於寡君而以戮於宗亦死且不朽若不獲命而使嗣宗職次及於事而帥偏師以修封疆雖遇執事其弗敢違其竭力致死無有

二心以盡臣禮所以報也王曰晉未可與爭重爲之禮而歸之武子之在楚也鄭賈人有將寘諸褚中以出既謀之未行而楚人歸之賈人如晉武子善視之如實出己者賈人曰吾無其功敢居其實吾小人也不可以厚誣君子遂適齊厲公六年武子佐下軍以諸侯之師侵陳至于鳴鹿遂侵蔡鄭人猶未服也武子如魯乞師以伐鄭厲公失道八年春正月藥書荀偃使人弑公使武子與士魴逆周子于京師周子曰孤始願不及此雖及

此豈非天乎抑人之求君使出命也立而不從將安用
之二三子用我今日否亦今日共而從君神之所福也
對曰羣臣之願也敢不唯命是聽庚午盟而入二月乙
酉周子即位于朝是爲悼公悼公之二年會諸侯于戚
謀鄭故也魯孟孫蔑曰請城虎牢以偪鄭武子曰善鄆
之會吾子聞崔子之言今不來矣滕薛小邾之不至皆
齊故也寡君之憂不唯鄭瑩將復於寡君而請於齊得
請而告吾子之功也若不得請事將在齊吾子之請諸

侯之福也豈惟寡君賴之明年悼公盟諸侯于雞澤齊世子光聽于會是會也許靈公不至冬武子帥師伐許八年楚子囊伐鄭討其侵蔡也子展欲從晉師子駟不可乃及楚平使王子伯駢告於晉武子使行人子員對曰君有楚命亦不使一介行李告於寡君而即安于楚君之所欲誰敢違君寡君將帥諸侯以見于城下唯君圖之九年武子代韓厥爲政會諸侯之師以伐鄭魯季武子齊崔杼宋皇鄖從武子門于剗門衛北宮括曹人

邾人從荀偃韓起門于師之梁滕人薛人從欒黶士魴
門于北門杞人邾人從趙武魏絳斬行栗甲戌師于汜
令於諸侯曰修器備盛餼糧歸老幼居疾于虎牢肆眚
圍鄭鄭人恐乃行成荀偃曰遂圍之以待楚人之救也
而與之戰不然無成武子曰許之盟而還師以敝楚人
吾三分四軍與諸侯之銳以逆來者於我未病楚不能
矣猶愈於戰暴骨以逞不可以爭大勞未艾君子勞心
小人勞力先王之制也乃許鄭成十一月己亥同盟于

戲鄭服也將盟鄭士莊子爲載書鄭子駢易其辭語具
子駢傳中荀偃請改載書武子曰我實不德而要人以
盟豈禮也哉非禮而何以主盟姑盟而退修德息師而
來終必獲鄭何必今日我之不德民將棄我豈惟鄭若
能休和遠人將至何恃於鄭乃盟而還十年夏四月悼
公會諸侯于柤荀偃士匄欲伐偃陽而封宋向戌焉武
子曰城小而固勝之不武弗勝爲笑固請丙寅圍之弗
克諸侯之師久於偃陽荀偃士匄請於武子曰水潦將

降懼不能歸請班師知伯怒投之以机出於其間曰女
成二事而後告余余恐亂命以不女違女既勤君而興
諸侯牽帥老夫以至于此既無武守而又欲易余罪曰
是實班師不然克矣余羸老也可重任乎七日不克必
爾乎取之五月庚寅荀偃士勾帥卒攻偃陽親受矢石
甲午滅之是會也宋公享公於楚丘請以桑林武子辭
荀偃士勾曰諸侯宋魯於是乎觀禮魯有禘樂賓祭用
之宋以桑林享君不亦可乎舞師題以旌夏公懼而退

入于房去旌卒享而還及著雍疾卜桑林見荀偃士匄
欲奔請禱焉武子不可曰我辭禮矣彼則以之猶有鬼
神於彼加之已而公疾有間冬諸侯之師城虎牢而戍
之晉師城梧及制士魴魏絳戍之諸侯之師還鄭而南
至於陽陵楚師不退武子欲退曰今我逃楚楚必驕驕
則可與戰矣欒黶曰逃楚晉之耻也合諸侯以益耻不
如死我將獨進師遂進與楚夾潁而軍鄭子蟜潛涉潁
以從楚師盟欒黶欲伐鄭師武子曰我實不能禦楚又

不能庇鄭鄭何罪不如致怨焉而還今伐其師楚必救之戰而不克爲諸侯笑克不可命不如還也遂還師侵鄭北鄙而歸其後鄭人懼又以晉之不疾我也故服於晉

中行獻子荀偃字伯游荀庚之子而桓子之孫也厲公六年爲上軍佐從欒書敗楚於鄢陵八年與欒書謀弑君而立悼公悼公十年與士匄攻偃陽滅之十三年代荀瑩將中軍十四年會諸侯之大夫伐秦師濟涇而次

秦人毒涇上流師人多死鄭司馬子蟜帥鄭師以進師
皆從之至于棧林不獲成焉獻子令曰鷄鳴而駕塞井
夷竈唯余馬首是瞻欒黶曰晉國之命未是有也余馬
首欲東乃歸下軍從之左史謂魏莊子曰不待中行伯
乎莊子曰夫子命從帥欒伯吾帥也吾將從之從帥所
以待夫子也伯游曰吾令實過悔之何及多遺秦禽乃
命大還衛獻公奔于齊悼公問衛故於獻子對曰不如
因而定之衛有君矣伐之未可以得志而勤諸侯史佚

有言曰因重而撫之仲虺有言曰亡者侮之亂者取之
推亡固存國之道也君其定衛以待時乎公從之平公
元年公與諸侯宴于溫使諸大夫舞曰歌詩必類齊高
厚之詩不類獻子怒且曰諸侯有異志矣使諸大夫盟
高厚高厚逃歸三年獻子將伐齊夢與厲公訟弗勝公
以戈擊之首墜於前跪而戴之奉之以走見梗陽之巫
臯他日見諸道與之言同巫曰今茲主必死若有事於
東方則可以逞獻子許諾公伐齊將濟獻子以朱絲繫

玉二穀而禱曰齊環怙恃其險負其衆庶棄好背盟陵虐神主曾孫彪將帥諸侯以討焉其官臣偃實先後之苟捷有功無作神羞官臣偃無敢復濟唯爾有神裁之沈玉而濟齊侯禦諸平陰塹防門而守之廣里夙沙衛曰不能戰莫如守險弗聽諸侯之士門焉齊人多死齊侯登巫山以望我師晉人使司馬斥山澤之險雖所不至必旆而疏陳之使乘車者左實右僞以旆先輿曳柴而從之齊侯見之畏其衆也乃脫歸齊師夜遁師曠告

公曰烏烏之聲樂齊師其遁邢伯告獻子曰有班馬之聲齊師其遁叔向告公曰城上有烏齊師其遁諸侯之師遂入平陰從齊師魯衛請攻險獻子士匄以中軍克京滋魏絳欒盈以下軍克邾音趙武韓起以上軍圍廬弗克遂及秦周伐雍門之荻范鞅門于雍門其御追喜以戈殺犬于門中孟莊子斬其桎勅倫反以爲公琴遂焚

雍門及西郭南郭劉難士弱率諸侯之師焚申池之竹木既又焚東郭北郭范鞅門于揚門州綽門于東閭左

驂迫還于門中以枚數闔齊侯駕將走郵棠太子與郭榮叩馬曰師速而疾畧也將退矣君何懼焉且社稷之主不可以輕輕則失衆君必待之將犯之太子抽劔斷鞅乃止晉師東侵及濰南及沂明年春諸侯還自沂上遂次于泗上疆魯田取邾田自鄆水歸于魯魯侯享晉六卿賄獻子束錦加璧乘馬先吳壽夢之鼎焉於是獻子瘳疽生瘍於頭濟河及著雍病目出大夫先歸者皆反士匄請見弗內請後曰鄭甥可二月甲寅卒而視不

可含宣子盟而撫之曰事吳敢不如事王猶視欒懷子曰其爲未卒事於齊故也乎乃復撫之曰主苟終所不嗣事于齊者有如河乃瞑受含

中行穆子荀吳獻子偃之子也平公十一年公使聘魯召襄公也十七年帥師伐無終及羣狄于太原用魏舒之謀敗之事具魏獻子傳昭公十五年穆子帥師伐鮮虞圍鼓鼓人或請以城叛穆子弗許左右曰師徒不勤而可以獲城何故不爲穆子曰吾聞諸叔向曰好惡不愆

民知所適則事無不濟或以吾城叛吾所甚惡也人以城來吾獨何好焉賞所甚惡若所好何若其弗賞是失信也何以庇民力能則進否則退量力而行吾不可以欲城而適姦所喪滋多使鼓人殺叛人而繕守備圍鼓三月鼓人或請降使其民見曰猶有食色姑修而城軍吏曰獲城而不取勤民而頓兵何以事君穆子曰吾以事君也獲一邑而教民怠將焉用邑邑以賈怠不如完舊賈怠無卒棄舊不祥鼓人能事其君我亦能事吾君

率義不爽好惡不愆城可獲而民知義所有死命而無
二心不亦可乎鼓人告食竭力盡而後取之克鼓而反
不戮一人以鼓子鵠歸既獻而反之頃公立以陸渾
氏睦於楚欲伐之范宣子夢文公攜荀吳而授之陸渾
故使穆子帥師公使屠蒯如周請有事於雒與三塗公
從之萇弘謂劉子曰客容猛非祭也其伐戎乎陸渾氏
甚睦於楚必是故也君其備之乃警戎備穆子帥師涉
自棘津使祭史先用牲于雒陸渾人弗知師從之庚午

遂滅陸渾數之以貳於楚也陸渾子奔楚其衆奔甘鹿
師歸獻俘于文宮初穆子之取鼓也既獻而反鼓子焉
頃公之六年又叛而屬諸鮮虞穆子畧東陽使師偽糶
者負甲以息於晉陽之門外遂襲鼓滅之以鼓子鳶韞
歸使涉佗守之令鼓人各復其所鼓子之臣曰夙沙釐
以其孥行軍吏執之辭曰我君是事非事土也名曰君
臣豈曰土臣今君實遷臣何賴於鼓穆子召之曰鼓有
君矣爾心事君吾定而祿爵對曰臣委質於狄之鼓未

委質於晉之鼓也臣聞之委質為臣無有二心委質而策死古之法也君有烈名臣無叛質敢即私利以煩司寇而亂舊法其若不虞何穆子歎曰吾何德之務而有是臣也乃使行既獻言於公與鼓子田於河陰使夙沙釐相之

中行文子荀寅穆子吳之子也初蔡昭侯朝楚楚令尹囊瓦拘之三年然後歸蔡侯怨如晉請伐楚定公六年諸侯會于召陵謀伐楚也荀寅求貨於蔡侯弗得言於

范獻子曰國家方危諸侯方貳將以襲敵不亦難乎水
潦方降疾瘧方起中山不服棄盟取怨無損於楚而失
中山不如辭蔡侯吾自方城以來楚未可以得志祇取
勤焉獻子從之乃辭蔡侯既而蔡侯以吳師伐楚遂入
郢幾滅楚國晉之失諸侯由荀寅也趙鞅之族趙午別
封於邯鄲謂之邯鄲午鞅嘗伐衛衛人懼貢五百家鞅
置之邯鄲十五年鞅謂午曰歸我衛貢吾舍諸晉陽午
許諾歸告其父兄父兄不可午遂背命鞅怒召午而殺

之午荀寅之甥也荀寅范吉射之姻也而相與睦不直
趙孟於是荀寅范吉射伐趙氏之宮趙鞅奔晉陽晉人
圍之范臯夷無寵於范吉射而欲爲亂於范氏梁嬰父
嬖於知文子文子欲以爲卿韓簡子與荀寅相惡魏襄
子亦與范吉射相惡故五子謀將逐荀寅而以梁嬰父
代之逐范吉射而以范臯夷代之荀躒言於公曰君命
大臣始禍者死載書在河今三臣始禍而獨逐鞅刑不
鈞矣請皆逐之故荀躒韓不信魏曼多奉公以伐范氏

中行氏弗克二子將伐公齊高疆曰三折肱知爲良醫
唯伐君爲不可民弗與也我以伐君在此矣三家未睦
可盡克也克之君將誰與若先伐君是使睦也弗聽遂
伐之國人助公二子敗從而伐之荀寅范吉射奔于朝
歌韓魏以趙氏爲請故趙鞅歸于晉二十年趙鞅圍朝
歌師于其南荀寅伐其郭使其徒自北門入已犯師而
出奔邯鄲明年趙鞅圍邯鄲邯鄲降荀寅奔鮮虞鮮虞
納荀寅于柏人又明年晉圍柏人荀寅范吉射奔齊初

范氏之臣王生惡張柳朔言諸吉射使爲柏人吉射曰夫非而讎乎對曰私讎不及公好不廢過惡不去善義之經也臣敢違之及范氏出張柳朔謂其子爾從主勉之我將止死王生授我矣吾不可以僭之遂死於柏人伯宗晉大夫孫伯糾之子也景公之六年楚子伐宋宋人使樂嬰齊來告急公欲救之伯宗曰不可古人有言曰雖鞭之長不及馬腹天方授楚未可與爭雖晉之彊能違天乎諺曰高下在心川澤納汙山藪藏疾瑾瑜匿

瑕國君含垢天之道也君其待之乃止景公之姊潞子
嬰兒之夫人也鄆舒爲政而殺之又傷潞子之目公將
伐之諸大夫皆曰不可鄆舒有三雋才不如待後之人
伯宗曰必伐之狄有五罪雋才雖多何補焉不祀一也
耆酒二也棄仲章而奪黎氏地三也虐我伯姬四也傷
其君目五也怙其雋才而不以茂德茲益罪也後之人
或者將敬奉德義以事人神而申固其命若之何待之
不討有罪曰將待後後有辭而討焉毋乃不可乎夫恃

才與衆亡之道也商紂由之故滅天反時爲災地反物
爲妖民反德爲亂亂則妖災生故文反正爲乏盡在狄
矣公從之故滅潞卒殺酆舒十四年梁山崩公以傳召
伯宗遇大車當道而覆立而避之曰避傳對曰傳爲速
也若俟吾避則加遲矣不如捷而行伯宗喜問其居曰
絳人也問絳事焉曰梁山崩將召伯宗謀之問將若之
何曰山有朽壤而崩可若何國主山川故山崩川竭君
爲之不舉降服乘縵徹樂出次祝幣史辭以禮焉其如

此而已雖伯宗若之何伯宗請見之不可遂以告而從之十五年伯宗夏陽說衛孫良夫甯相鄭人伊雒之戎陸渾蠻侵宋以其辭會也師于鍼衛人不保說欲襲衛曰雖不可入多俘而歸有罪不及死伯宗曰不可衛唯信晉故師在其郊而不設備若襲之是棄信也雖多衛俘而晉無信何以求諸侯乃止師還衛人登陴聞說謀故也厲公之五年三郤害伯宗譖而殺之及藥弗忌韓獻子曰郤氏其不免乎善人天地之紀也而驟絕之不

亡何待初伯宗朝以喜歸其妻曰子貌有喜何也曰吾
言於朝諸大夫皆謂我智似陽子對曰陽子華而無實
主言而無謀是以難及其身子何喜焉伯宗曰吾飲諸
大夫酒而與之語爾試聽之曰諾既飲其妻曰諸大夫
莫子若也然而民不戴其上久矣難必及子乎盍亟索
士整庇州犁焉得畢陽及伯宗將遇害畢陽實送州犁
于荆

羊舌肸字叔向晉武公子伯僑之後也伯僑之孫突爲

羊舌大夫因以爲氏突生職事悼公佐中軍尉盱職之
子也博識多文辭悼公十四年從荀偃伐秦平公立使
叔向爲傅三年從公伐齊齊師夜遁叔向以城上有烏
也先知之以告於公是役也楚師伐鄭董叔以天道在
西北南師不時必無功叔向曰在其君之德也四年從
士匄會諸侯于柯初叔向之母妬叔虎之母美而不使
其子皆諫其母其母曰深山大澤實生龍蛇彼美余懼
其生龍蛇以禍女女敝族也國多大寵不仁人間之不

亦難乎余何愛焉使往視寢生叔虎美而有勇力藥盈
嬖之六年士刁逐藥盈殺叔虎囚叔向焉人謂叔向曰
子離於罪其爲不知乎叔向曰與其死亡若何詩曰優
哉游哉聊以卒歲知也樂王鮒見叔向曰吾爲子請叔
向弗應出不拜其人皆咎叔向叔向曰必祁大夫室老
聞之曰樂王鮒言於君無不行求救吾子吾子不許祁
大夫所不能也而曰必由之何也叔向曰樂王鮒從君
者何能行祁大夫外舉不棄讎內舉不失親其獨遺

我乎詩曰有覺德行四國順之夫子覺者也晉侯問叔
向之罪於樂王鮒對曰不棄其親其有焉於是祁奚老
矣聞之乘駟而見宣子曰詩云惠我無疆子孫保之書
曰聖有謨訓明徵定保夫謀而鮮過惠訓不倦者叔向
有焉社稷之固也猶將十世宥之以勸能者今壹不免
其身以棄社稷不亦惑乎鯀殛而禹興伊尹放太甲而
相之卒無怨色管蔡爲戮周公右王若之何其以虎也
棄社稷子爲善誰敢不勉多殺何爲宣子說與之乘以

言諸公而免之不見叔向而歸叔向亦不告免焉而朝是歲士匄錮欒氏會諸侯於商任齊侯衛侯不敬叔向曰二君者必不免會朝禮之經也禮政之興也政身之守也怠禮失政失政不立是以亂也十一年衛人侵戚東鄙孫林父愬于晉晉成茅氏衛伐茅氏殺晉成三百人晉以孫氏故執衛殤公齊侯鄭伯爲衛故如晉公兼享之公賦嘉樂國景子相齊侯賦蓼蕭子展相鄭伯賦緇衣叔向命公拜二君曰寡君敢拜齊君安我先君之

宗桃也敢拜鄭君之不貳也國子使晏平仲私於叔向
曰晉君宣其明德於諸侯恤其患而補其闕正其違而
治其煩所以爲盟主也今爲臣執君若之何叔向告趙
文子文子以告公公言衛侯之罪使叔向告二君國子
賦轡之柔矣子展賦將仲子兮公乃許歸衛侯叔向曰
鄭七穆罕氏其後亡乎子展儉而壹明年宋向戌弭兵
晉楚會諸侯之大夫盟于宋將盟楚人衷甲趙孟患之
叔向曰何害匹夫一爲不信單斃而死若合諸侯之卿

以爲不信必不捷矣食言者不病非子之患也夫以信召人而以僭濟之必莫之與也安能害我且吾因宋以守病則夫能致死與宋致死雖倍楚可也子何懼焉又不及是曰弭兵以召諸侯而稱兵以害我吾庸多矣非所患也及盟晉楚爭先晉人曰晉固爲諸侯盟主未有先晉者也楚人曰子言晉楚匹也若晉常先是楚弱也且晉楚狎主諸侯之盟也久矣豈專在晉叔向謂趙孟曰諸侯歸晉之德只非歸其尸盟也子務德無爭先且

諸侯盟小國固必有主盟者楚爲晉細不亦可乎乃先
楚人已而宋公兼享晉楚之大夫趙孟爲客子木與之
言弗能對使叔向侍言焉子木亦不能對子木歸以語
王曰宜晉之霸也有叔向以佐其卿楚無以當之未可
與爭也十七年趙武會楚公子圍子號公子圍設服離
衛趙武問叔向曰令尹自以爲王矣如何對曰王弱令
尹彊其可哉雖然必不終也趙孟曰何故曰彊以克弱
而安之彊不義也不義而彊其斃必速令尹爲王必求

諸侯晉少懦矣諸侯將往若獲諸侯其虐滋甚民弗堪也將何以終夫以彊取不義而克必以爲道道以淫虐弗可久已矣楚子干來奔從車五乘叔向使與秦公子同食皆百人之餼趙孟曰秦公子富叔向曰底祿以德德鈞以年年鈞以尊公子以國不聞以富夫以千乘去其國彊禦已甚詩曰不侮鰥寡不畏彊禦秦楚匹也使后子與子干齒十八年韓須如齊逆女齊陳無宇送女致少姜少姜有寵於平公公謂之少齊謂陳無宇非卿

執諸中都少姜爲之請曰送從逆班畏大國也猶有所
易是以亂作叔向言於公曰彼何罪君使公族逆之齊
使上大夫送之猶曰不共君求以貪國則不共而執其
使君刑已頗何以爲盟主且少姜有辭遂歸無字二十
一年韓宣子如楚送女叔向爲介鄭子皮子太叔勞諸
索氏太叔謂叔向曰楚王汰侈已甚子其戒之叔向曰
汰侈已其身之災也焉能及人若奉吾幣帛慎吾威儀
守之以信行之以禮敬始而思終終無不復從而不失

儀敬而不失威道之以訓辭奉之以舊法考之以先王
度之以二國雖汰侈若我何及楚楚子欲辱韓起遂啓
彊諫之乃厚爲宣子禮王欲赦叔向以其所不知而不
能亦厚其禮而歸之明年鄭鑄刑書叔向詒子產書曰
始吾有虞於子今則已矣昔先王議事以制不爲刑辟
懼民之有爭心也猶不可禁禦是故閑之以義糾之以
政行之以禮守之以信奉之以仁制爲祿位以勸其從
嚴斷刑罰以威其淫懼其未也故誨之以忠聳之以行

教之以務使之以和臨之以敬莅之以彊斷之以剛猶
求聖哲之上明察之官忠信之長慈惠之師民於是乎
可任使也而不生禍亂民知有辟則不忌於上並有爭
心以徵於書而徵幸以成之弗可爲矣夏有亂政而作
禹刑商有亂政而作湯刑周有亂政而作九刑三辟之
興皆叔世也今吾子相鄭國作封洫立謗政制參辟鑄
刑書將以靖民不亦難乎詩曰儀式刑文王之典日靖
四方又曰儀刑文王萬邦作孚如是何辟之有民知爭

端矣將棄禮而徵於書錐刀之末將盡爭之亂獄滋豐
賄賂並行終子之世鄭其敗乎盱聞之國將亡必多制
其此之謂乎復書曰若吾子之言僑不才不能及子孫
吾以救世也既不承命敢忘大惠是歲楚公子棄疾來
聘報韓子也宣子之適楚也楚人弗逆棄疾及境公將
亦弗逆叔向曰楚辟我衷若何効辟詩曰爾之教矣民
胥倣矣從我而已焉用效人之辟書曰聖作則無寧以
善人爲則而則人之辟乎匹夫爲善民猶則之況國君

乎公說乃逆之昭公元年楚子在申召蔡靈侯靈侯將往其大夫曰王貪而無信唯蔡是憾今幣重言甘誘我也不如無往蔡侯不可楚子伏甲而饗蔡侯於申醉而執之殺之刑其士七十人使公子棄疾帥師圍蔡韓宣子問於叔向曰楚其克乎對曰克哉蔡侯獲罪於其君而不能其民天將假手於楚以斃之何故不克然盍聞之不信以幸不可再也楚王奉孫吳以討於陳曰將定而國陳人聽命而遂縣之今又誘蔡而殺其君以圍其

國雖幸而克必受其咎弗能久矣桀克有緡以喪其國
紂克東夷而隕其身楚小位下而亟暴於二王能無咎
乎天之假助不善非祚之也厚其凶惡而降之罰也且
譬之如天其有五才而將用之力盡而敝之是以無拯
不可復振單子會韓宣子于戚視下言徐叔向曰單子
其將死乎朝有著定會有表衣有襜帶有結會朝之言
必聞於表著之位所以昭事序也視不過結襜之中所
以道容貌也言以命之容貌以明之失則有闕今單子

爲王官伯而命事於會視不登帶言不過步貌不道容而言不昭矣不道不共不昭不從無守氣矣歲終單子卒是歲魯人葬齊歸公無感容大蒐于北蒲叔向曰魯公室其卑乎君有大喪國不廢蒐有三年之喪而無一朝之感國不恤喪不忌君也君無感容不顧親也能無卑乎後十五年而魯君孫于齊三年楚子干歸于楚楚人弑靈王以立之韓宣子問於叔向曰子干其濟乎對曰難宣子曰同惡相求如市賈焉何難對曰無與同好

誰與同惡取國有五難有寵而無人一也有人而無主
二也有主而無謀三也有謀而無民四也有民而無德
五也子干在晉十三年矣晉楚之從不聞達者可謂無
人族盡親叛可謂無主無釁而動可謂無謀爲羈終世
可謂無民亡無愛徵可謂無德王虐而不忌楚君子干
涉五難以弑舊君誰能濟之有楚國者其棄疾乎君陳
蔡城外屬焉苛慝不作盜賊隱伏私欲不違民無怨心
先神命之國民信之芊姓有亂必季實立楚之常也獲

神一也有民二也令德三也寵貴四也居常五也有五利以去五難誰能害之子干之官則右尹也數其貴寵則庶子也以神所命則又遠之其貴亡矣其寵棄矣民無懷焉國無與焉將何以立宣子曰齊桓晉文不亦是乎對曰齊桓衛姬之子也有寵於僖有鮑叔牙賓須無隰朋以爲輔佐有莒衛以爲外主有國高以爲內主從善如流下善齊肅不藏賄不從欲施舍不倦求善不厭是以有國不亦宜乎我先君文公狐季姬之子也有寵

於獻好學而不貳生十七年有士五人有先大夫子餘
子犯以爲腹心有魏犢賈佗以爲股肱有齊宋秦楚以
爲外主有欒郤孤先以爲內主亡十九年守志彌篤惠
懷棄民民從而與之獻無異親民無異望天方相晉將
何以代文此二君者異於子干共有寵子國有奧主無
施於民無援於外去晉而不送歸楚而不逆何以冀國
子干果敗卒立者棄疾如其言焉昭公成虎初諸侯皆
有二心爲魯取鄭故將率諸侯以討之叔向曰諸侯不

可以不示威乃並徵會治兵于邾南甲車四千乘羊舌
鮒攝司馬遂合諸侯於平丘次于衛地叔鮒求貨于衛
淫芻蕘者衛人使屠伯饋叔向羹與一筐錦曰諸侯事
晉未敢攜貳况衛在君之宇下而敢有異志芻蕘者異
於他日敢請之叔向受羹反錦曰晉其有羊舌鮒者瀆
貨無厭亦將及矣爲此役也子若以君命賜之其已客
從之未退而禁之晉將尋盟齊人不可公使叔向告劉
獻公曰抑齊人不盟若之何對曰盟以底信君苟有信

諸侯不貳何患焉告之以文辭董之以威武雖齊不許
君庸多矣天子之老請帥王賦元戎十乘以先啟行遲
速唯君叔向告于齊曰諸侯求盟已在此矣今君弗利
寡君以爲請對曰諸侯討貳則有尋盟若皆用命何盟
之尋叔向曰國家之敗有事而無業事則不經有業而
無禮經則不序有禮而無威序則不共有威而不昭共
則不明不明棄共百事不終所由傾覆也是故明王之
制使諸侯歲聘以志業間朝以講禮再朝而會以示威

再會而盟以顯昭明志業於好講禮於等示威於衆昭明於神自古以來未之或失也存亡之道恒由是興晉禮主盟懼有不治奉承齊犧而布諸君求終事也君曰余必廢之何齊之有唯君圖之寡君聞命矣齊人懼對曰小國言之大國制之敢不聽從既聞命矣敬共以往遲速唯君叔向曰諸侯有間矣不可以不示衆八月辛未治兵建而不旆壬申復旆之諸侯畏之邾人莒人愬于晉曰魯朝夕伐我幾亡矣我之不共魯故之以公不

見魯侯使叔向辭之曰諸侯將以甲戌盟寡君知不得
事君矣請君無勤子服惠伯對曰君信蠻夷之訴以絕
兄弟之國棄周公之後亦唯君寡君聞命矣叔向曰寡
君有甲車四千乘在雖以無道行之必可畏也況其率
道其何敵之有牛雖瘠僨於豚上其畏不死南蒯子仲
之憂其庸可棄乎若奉晉之衆用諸侯之師因邾莒杞
鄆之怒以討魯罪間其二憂何求而弗克魯人懼聽命
甲戌同盟于平邱魯君不與盟晉執季孫意如已而歸

之惠伯曰寡君未知其罪合諸侯而執其老若猶有罪
死命可也若曰無罪而惠免之諸侯不聞是逃命也何
免之爲請從君惠於會宣子患之謂叔向曰子能歸季
孫乎曰不能鮒也能之乃使叔魚見季孫曰昔鮒也得
罪於晉君自歸於魯君微武子之賜不至于今雖獲歸
骨於晉猶子則肉之敢不盡情歸子而不歸鮒也聞諸
吏將爲子除館於西河其若之何且泣平子懼而先歸
使惠伯待禮焉明年邢侯與雍子爭鄙田久而無成士

景伯如楚叔魚攝理韓宣子命斷舊獄罪在雍子雍子
納其女於叔魚叔魚蔽罪邢侯邢侯怒殺叔魚與雍子
於朝宣子問其罪於叔向叔向曰三人同罪施生戮死
可也雍子自知其罪而賂以賈直鮒也鬻獄邢侯專殺
其罪一也已惡而掠美爲昏貪以敗官爲墨殺人不忌
爲賊夏書曰昏墨賊殺臯陶之刑也請從之乃施邢侯
而尸雍子與叔魚於市孔子曰叔向古之遺直也治國
制刑不隱於親三數叔魚之惡不爲末減曰義也夫可

謂直矣平邱之會數其賄也以寬衛國晉不爲暴歸魯
季孫稱其詐也以寬魯國晉不爲虐邢侯之獄言其貪
也以正刑書晉不爲頗三言而除三惡加三利殺親益
榮猶義也夫五年公使荀躒如周葬穆后籍談爲介景
王既葬除喪以文伯宴樽以魯壺王曰伯氏諸侯皆有
以鎮撫王室晉獨無有何也文伯揖籍談對曰諸侯之
封也皆受明器於王室以鎮撫其社稷故能薦彝器於
王晉居深山戎狄之與鄰而遠於王室王靈不及拜戎

不暇其何以獻器王曰叔氏而忘諸乎叔父唐叔成王之母弟也其反無分乎密須之鼓與其大路文所以大蒐也闕鞏之甲武所以克商也唐叔受之以處參虛匡有戎狄其後襄之二路鉞鉞鉅鬲彤弓虎賁文公受之以有南陽之田撫征東夏非分而何夫有勲而不廢有績而載奉之以土田撫之以彝器旌之以車服明之以文章子孫不忘所謂福也福祚之不登叔父焉在且昔而高祖孫伯鷹司晉之典籍以爲大政故曰籍氏及辛

有之二子董之晉於是乎有董史女司典之後也何故
忘之籍談不能對歸以告叔向叔向曰王其不終乎吾
聞之所樂必卒焉今王樂憂若卒以憂不可謂終王一
歲而有三年之喪二焉於是乎以喪賓宴又求彛器樂
憂甚矣且非禮也彛器之來嘉功之由非由喪也三年
之喪雖貴遂服禮也王雖弗遂宴樂以早亦非禮也禮
王之大經也一動而失二禮無大經矣言以考典典以
志經忘經而多言舉典將焉用之叔向卒其子楊食我

有黨於祁盈祁盈之亂食我助之晉人殺祁盈并殺食
我遂滅羊舌氏初叔向欲娶於申公巫臣氏其母欲娶
其黨叔向曰吾母多而庶鮮吾懲舅氏矣其母曰子靈
之妻殺三夫一君一子而亡一國兩卿矣可無懲乎吾
聞之甚美必有甚惡是鄭穆少妃姚子之子子貉之妹
也子貉早死無後而天鍾美於是將必以是大有敗也
昔有仍氏生女黥黑而甚美光可以鑑名曰元妻樂正
后夔取之生伯封實有豕心貪惓無厭忿類無期謂之

封豕有窮后羿滅之夔是以不祀且三代之亡共子之廢皆是物也女何以爲哉夫有尤物足以移人苟非德義則必有禍叔向懼不敢娶平公彊使娶之生伯石伯石始生子容之母走謁諸姑曰長叔姒生男姑視之及堂聞其聲而還曰是豺狼之聲也狼子野心非是莫喪羊舌氏矣遂弗視

司馬女齊字叔侯晉大夫平公十一年趙武會諸侯之大夫以討衛執甯喜北宮遺使女齊以先歸十四年齊

高子容與宋司徒見於智伯叔齊相禮賓出叔侯言於
智伯曰二子皆將不免子容專司徒侈皆亡家之主也
智伯曰何如對曰專則速及侈將以其力斃專則人實
斃之將及矣晉悼夫人杞出也魯嘗侵杞平公使司馬
侯如魯治杞田弗盡歸也夫人愠曰齊也取貨先君若
有知也不尚取之公告叔侯叔侯曰虞虢焦滑霍楊韓
魏皆姬姓也晉是以大若非侵小將何所取武獻以下
兼國多矣誰得治之杞夏餘也而即東夷魯周公之後

也而睦於晉以杞封魯猶可而何有焉魯之於晉也職
貢不乏玩好時至公卿大夫相繼於朝史不絕書府無
虛月如是可矣何必瘠魯以肥杞且先君而有知也無
寧夫人而焉用老臣十七年秦后子鍼來奔初后子有
寵於桓如二君於景其母曰弗去懼選故鍼適晉其車
千乘后子享晉侯造舟于河十里舍車自雍及絳歸取
酬幣終事八反司馬侯問焉曰子之車盡於此而已乎
對曰此之謂多矣若能少此吾何以得見叔侯以告公

且曰秦后子必歸臣聞君子能知其過必有令圖令圖
天所贊也二十年楚靈王使椒舉來聘且求諸侯公欲
勿許司馬侯曰不可楚王方侈天或者欲逞其心以厚
其毒而降之罰未可知也其使能終亦未可知也晉楚
唯天所相不可與爭君其許之而修德以待其歸若歸
於德吾猶將事之況諸侯乎若適淫虐楚將棄之吾又
誰與爭公曰晉有三不殆其何敵之有國險而多馬齊
楚多難有是三者何鄉而不濟對曰恃險與馬而虞隣

國之難是三殆也四嶽三塗陽城太室荆山中南九州之險也是不一姓冀之北土馬之所生無興國焉恃險與馬不可以爲固也從古以然是以先王務修德音以享人神不聞其務險與馬也鄰國之難不可虞也或多難以固其國啓其疆土或無難以喪其國失其守宇若何虞難齊有仲孫之難而獲桓公至今賴之晉有里克之難而獲文公是以爲盟主衛邢無難敵亦喪之故人之難不可虞也恃此三者而不修德政則救亡不暇又

何能濟君其許之紂作淫虐文王惠和商是以隕周是以興夫豈爭諸侯公乃許之二十一年魯昭公來朝自郊勞至於贈賄無失禮公謂女齊曰魯侯不亦善於禮乎對曰魯侯焉知禮公曰何爲自郊勞至於贈賄禮無違者何爲不知禮焉曰是儀也不可謂禮禮所以守其國家行其政令無失其民者也今政令在家不能取也有子家羈弗能用也奸大國之盟陵虐小國利人之難不知其私公室四分民食於他思莫在公不圖其終爲

國君難將及身不恤其所禮之本末將於此乎在而屑屑焉習儀以亟言善於禮不亦遠乎君子謂叔侯於是乎知禮范宣子與和大夫爭田司馬侯見曰吾聞子有和之怒吾以爲不信且子爲正卿諸侯皆有二心是之不憂而怒和大夫非子之任也宣子卒從之司馬侯卒叔向見其子撫而泣之曰自此其父之死也吾無與比而事君者矣昔者其父始之我終之我始之夫子終之無不可者今夫子往矣我無所比焉爾

祁奚獻侯之後也其先食邑於祁故以爲氏悼公即位
祁奚爲中軍尉羊舌職佐之及辭公問可代稱解狐其
讎也將立而卒又問焉對曰臣之子午也可午之少也
婉以從令好學而不戲其長也彊志而用命守業而不
淫其冠也柔惠小物而鎮定大事於是使祁午爲中軍
尉羊舌赤佐之君子曰祁奚可謂不黨矣外舉不隱仇
內舉不隱子悼公以祁奚爲公族大夫

解揚字子虎晉大夫也景公六年楚子圍宋宋人使樂

嬰齊來告急公欲救之伯宗不可告且待之乃使解揚如宋使無降楚曰晉師悉起將至矣鄭人囚而獻諸楚楚子厚賂之使反其言不許三而許之登諸樓車使呼宋人而告之遂致其君命楚子將殺之使與之言曰爾既許不穀而反之何故非我無信女則棄之速即爾刑對曰臣聞之君能制命爲義臣能承命爲信信載義而行之爲利謀不失利以衛社稷民之主也義無二信信無二命君之賂臣不知命也受命以出有死無賈又可

賂乎臣之許君以成命也死而成命臣之祿也寡君有
信臣下臣獲考死又何求楚子舍之以歸晉爵之爲上
卿

欒武子書晉公族也靖侯之孫欒賁食邑於欒故以爲
氏世爲晉卿景公三年楚莊王圍鄭武子佐下軍從荀
林父救鄭鄭已服楚桓子欲還先穀不可武子曰楚自
克庸已來其君無日不討國人而訓之於民生之不易
禍至之無日戒懼之不可以怠在軍無日不討軍實而

申儆之於勝之不可保紂之百克而卒無後訓之以若
敖蚡冒萆路藍縷以啟山林箴之曰民生在勤勤則不
匱不可謂驕先大夫子犯有言曰師直爲壯曲爲老我
則不德而徼怨乎楚我曲楚直不可謂老其君之戎分
爲二廣廣有一卒卒偏之兩右廣初駕數及日中左則
受之以至於昏內官序當其夜以備不虞不可謂無備
子良鄭之良也師叔楚之崇也師叔入盟子良在楚楚
鄭親矣來勸我戰我克則來不克遂往以我卜也鄭不

可從趙括趙同曰帥師以來唯敵是求克敵得屬又何
俟必從彘子及戰晉師大敗十一年武子爲下軍將從
卻克伐齊大敗齊師而還十三年代卻獻子爲政鄭公
孫申帥師疆許田武子救許伐鄭取汜祭十五年楚公
子嬰齊伐鄭武子救鄭與楚師遇於繞角楚師還晉師
遂侵蔡楚公子申公子成以申息之師救蔡禦諸桑隧
趙同趙括欲戰請於武子武子將許之知莊子范文子
韓獻子諫曰不可吾來救鄭楚師去我吾遂至於此是

遷戮也戮而不已又怒楚師必不克雖克不令成師以
出而敗楚之二縣何榮之有焉若不能敗爲辱已甚不
如還也乃遂還於是軍師之欲戰者衆或謂武子曰聖
人與衆同欲是以濟事子盍從衆子爲大政將酌於民
者也子之佐十一人其不欲戰者三人而已欲戰者可
謂衆矣商書曰三人占則從二人衆故也武子曰善鈞
從衆夫善衆之主也三卿爲主可謂衆矣從之不亦可
乎十七年武子侵蔡遂侵楚獲申驪侵沈獲沈子揖初

從知韓范也君子曰從善如流宜哉詩曰愷悌君子遐
不作人求善也夫作人斯有功績矣成公十三年秦桓
公既與晉為令狐之盟而又召狄與楚欲道以伐晉諸侯
是以睦於晉晉以諸侯之師伐秦使呂相絕秦曰昔逮
我獻公及穆公相好戮力同心申之以盟誓重之以昏
姻天禍晉國文公如齊惠公如秦無祿獻公即世穆公
不忘舊德俾我惠公用能奉祀于晉又不能成大勲而
為韓之師亦悔于厥心用集我文公是穆之成也文公

躬擐甲胄跋履山川踰越險阻征東之諸侯虞夏商周
之脩而朝諸秦則亦既報舊德矣鄭人怒君之疆場我
文公帥諸侯及秦圍鄭秦大夫不詢于我寡君擅及鄭
盟諸侯疾之將致命于秦文公恐懼綏靜諸侯秦師克
還無害則是我有大造於西也無祿文公即世穆為不
弔蔑死我君寡我襄公迭我殽地奸絕我好伐我保城
殄滅我費滑散離我兄弟撓亂我同盟傾覆我國家我
襄公未忘君之舊勲而懼社稷之隕是以有殽之師猶

願赦罪于穆公穆公弗聽而即楚謀我天誘其衷成王
隕命穆公是以不克逞志于我穆襄即世康靈即位康
公我之自出又欲闕翦我公室傾覆我社稷帥我蝥賊
以來蕩搖我邊疆我是以有令狐之役康猶不悛入我
河曲伐我涑川俘我王官翦我羈馬我是以有河曲之
戰東道之不通則是康公絕我好也及君之嗣也我君
景公引領西望曰庶撫我乎君亦不惠稱盟利吾有狄
難入我河縣焚我箕郛芟夷我農功虔劉我邊垂我是

以有輔氏之聚君亦悔禍之延而欲徼福于先君獻穆使伯車來命我景公曰吾與女同好棄惡復修舊德以追念前勲言誓未就景公即世我寡君是以有令狐之會君又不祥背棄盟誓白狄及君同州君之仇讐而我昏姻也君來賜命曰吾與女伐狄寡君不敢顧昏姻畏君之威而受命于吏君有二心於狄曰晉將伐女狄應且憎是用告我楚人惡君之二三其德也亦來告我曰秦背令狐之盟而來求盟于我昭告昊天上帝秦三公

楚三王曰余雖與晉出入余唯利是視不穀惡其無成德
是用宣之以懲不壹諸侯備聞此言斯是用痛心疾首暱
就寡人寡人帥以聽命唯好是求君若惠顧諸侯矜哀寡
人而賜之盟則寡人之願也其承寧諸侯以退豈敢徵亂
君若不施大惠寡人不佞其不能以諸侯退矣敢盡布之
執事俾執事實圖利之於是武子將中軍荀庚佐之士燮
將上軍卻錡佐之韓厥將下軍荀瑩佐之趙旃將新軍卻
至佐之卻縠御戎欒鍼為右孟獻子曰晉帥乘和師必有

大功五月丁亥以諸侯之師及秦師戰于麻隧秦師敗績
獲秦成差及不更女父師遂濟涇及侯麗而還迓公於新
楚十六年楚子使公子成以汝陰之田求成于鄭故鄭
叛晉公將伐鄭范文子不可武子曰不可以當吾世而
失諸侯必伐鄭乃興師武子將中軍士燮佐之卻錡將
上軍荀偃佐之韓厥將下軍卻至佐新軍荀罃居守晉
師既起鄭人聞之使告于楚楚子救鄭子反將中軍子
重將左子辛將右五月晉師濟河聞楚師至范文子欲

反武子不可六月晉楚遇於鄢陵甲午晦楚晨壓晉軍而陳軍吏患之武子曰楚師輕窵固壘而待之三日必退退而擊之必獲勝焉及戰楚師大敗共王夜遁子反死之晉入楚軍三日穀厲公侈多外嬖反自鄢陵欲盡去羣大夫而立其左右胥童長魚矯皆嬖於公而怨郤氏告公曰必去諸大夫盍先三郤武子素惡郤氏亦以為言於是長魚矯殺郤犇郤錡郤至皆尸諸朝胥童以甲劫武子及中行偃於朝矯曰不殺二子憂必及君公

曰一朝而尸三卿余不忍益也對曰人將忍君臣聞亂
在外爲姦在內爲軌御姦以德御軌以刑不施而殺不
可謂德臣偏而不討不可謂刑德刑不立姦軌並至臣
請行遂出奔狄公使辭於二子曰寡人有討於郤氏郤
氏既伏其辜矣大夫無辱其復職位皆再拜稽首曰君
討有罪而免臣於死君之惠也二臣雖死敢忘君德乃
皆歸公使胥童爲卿公遊於匠麗氏武子中行偃遂執
公焉召士匄韓厥皆辭之七年正月庚申武子中行偃

使程滑弑厲公春秋書之曰晉弑其君州蒲不稱臣君無道也欒氏中行氏以車一乘葬公于翼東門之外使荀瑩士魴逆周子于京師而立之是為悼公武子之子曰鍼鄆陵之役步毅御厲公欒鍼為右有淖於前乃皆左右相違於淖欒范以其族夾公行陷於淖欒書將載公鍼曰書退國有大任焉得專之且侵官冒也失官慢也離局姦也有三罪焉不可犯也乃掀公以出於淖見子重之旌請於公曰楚人謂夫旌子重之麾也彼其子

重也日臣之使於楚也子重問晉國之勇臣對曰好以衆整曰又何如臣對曰好以暇今兩國治戒行人不使不可謂整臨事食言不可謂暇請攝飲焉公許之使行人執榼承飲造于子重曰寡君乏使使鍼御持矛是以不得犒從者使某攝飲子重曰夫子嘗與吾言於楚必是故也不亦識乎受而飲之免使者而復鼓

魏莊子絳武子犢之子也武子之父曰畢萬畢公高之後萬事獻公為大夫獻公賜之魏故以魏為氏獻公之

二十一年武子從公子重耳出亡公子反國是為文公
被廬之蒐荀林父御戎武子為右文公之為公子也過
曹為曹共公所不禮其大夫僖負羈饋公子盤飧加璧
焉及文公伐曹令無入僖負羈之宮而免其族武子與
顓頊怒曰勞之不圖報於何有藝僖負羈氏武子傷於
胷公欲殺之而愛其材使問且視之病將殺之武子束
胷見使者曰以君之靈不有寧也距躍三百曲踊三百
乃舍之殺顓頊以徇武子卒莊子嗣為大夫悼公元年

命莊子為司馬三年公會諸侯盟于雞澤公弟揚干亂行於曲梁莊子戮其僕公怒謂羊舌赤曰合諸侯以為榮也揚干為戮何辱如之必殺魏絳無失也對曰絳無貳志事君不辟難有罪不逃刑其將來辭何辱命焉言終莊子至授僕人書將伏劍士魴張老止之公讀其書曰日君之使使臣斯司馬臣聞師衆以順為武軍事有死無犯為敬君合諸侯臣敢不敬君師不武執事不敬罪莫大焉臣懼其死以及揚干無所逃罪不能致訓至

於用鉞臣之罪重敢不從以怒君心請歸死於司寇公
跣而出曰寡人之言親愛也吾子之討軍禮也寡人有
弟弗能教訓使干大命寡人之過也子無重寡人之過
敢以為請公於是以莊子為能以刑佐民矣反役與之
禮食使佐新軍四年無終子使其臣孟樂來絳因莊子
納虎豹之皮以請和諸戎公曰戎狄無親而貪不如伐
之莊子曰諸侯新服陳新來和將觀於我我德則睦否
則攜貳勞師於戎而楚伐陳必不能救是棄陳也諸華

必叛戎禽獸也獲戎失華無乃不可乎夏訓有之曰有窮后羿公曰后羿何如對曰昔有夏之方衰也后羿自鉏遷于窮石因夏民以代夏政恃其射也不修民事而淫于原獸棄武羅伯因熊髡尨圉而用寒浞寒浞伯明氏之讒子弟也伯明后寒棄之夷羿收之信而使之以爲己相浞行媚于內而施賂于外愚弄其民而虞羿于田樹之詐慝以取其國家外內咸服羿猶不悛將歸自田家衆殺而亨之以食其子其子不忍食諸死于窮門

靡奔有鬲氏浞因羿室生澆及豷恃其讒慝詐偽而不
德于民使澆用師滅斟灌及斟尋氏處澆于過處豷于
戈靡自有鬲氏收二國之燼以滅浞而立少康少康滅
澆于過后杼滅豷于戈有窮由是遂亡失人故也昔辛
甲氏之為太史也命百官官箴王闕於虞人之箴曰芒
芒禹跡畫為九州經啟九道民有寢廟獸有茂草各有
攸處德用不擾在帝夷羿冒于原獸亡其國恤而思其
麇牡武不可重用不恢于夏家獸臣司原敢告僕夫虞

箴如是可不懲乎於是悼公好田故莊子及之公曰然則莫如和我乎對曰和我有五利焉戎狄荐居貴貨易土土可賈焉一也邊鄙不聳民狎其野穡人成功二也戎狄事晉四鄰振動諸侯懷威三也以德綏戎師徒不勤甲兵不頓四也鑒于后羿而用德度遠至邇安五也君其圖之公說使莊子盟諸戎修民事田以時九年冬公會諸侯之師伐鄭未能定鄭而歸公謀所以息民莊子請施舍輸積聚以貸自公以下苟有積者盡出之國

無滯積亦無困人公無禁利亦無貪民祈以幣更賓以
特牲器用不作車服從給行之期年國乃有節三駕而
楚不能與爭焉明年公以鄭未服故城梧及制使士魴
及莊子戌之鄭人懼及晉平十一年鄭人賂公以師悝
師觸師蠲廣車軌車淳十五乘甲兵備凡兵車百乘歌
鍾二肆及其鐃磬女樂二八公以樂之半賜莊子曰子
教寡人和諸戎狄以正諸華八年之中九合諸侯如樂
之和無所不諧請與子樂之辭曰夫和我狄國之福也

八年之中九合諸侯諸侯無慝君之靈也二三子之勞也臣何力之有焉抑臣願君安其樂而思其終也詩曰樂只君子殿天子之邦樂只君子福祿攸同便蕃左右亦是率從夫樂以安德義以處之禮以行之信以守之仁以厲之而後可以殿邦國同福祿來遠人所謂樂也書曰居安思危思則有備有備無患敢以此規公曰子之教敢不承命抑微子寡人無以待戎不能濟河夫賞國之典也藏在盟府不可廢也子其受之莊子於是乎

始有金石之樂禮也十三年為樂廬下軍佐不及當國而卒

魏獻子舒莊子之子也平公十七年從中行穆子伐無終及羣狄于太原將戰獻子曰彼徒我車所遇又阨以什共車必克困諸阨又克請皆卒自我始乃毀車以為行五乘為三伍穆子之嬖人不肯即斬以徇為五陳以相離兩於前伍於後專為右角參為左角偏為前拒以誘之翟人笑之未陳而薄之大敗之頃公十二年祁盈

作亂楊食我助之公殺祁盈及楊食我遂滅祁氏羊舌氏於是韓宣子卒獻子代為政分祁氏之田以為七縣分羊舌氏之田以為三縣司馬彌牟為鄆大夫賈辛為祁大夫司馬烏為平陵大夫魏戊為梗陽大夫知徐吾為塗水大夫韓固為馬首大夫孟丙為孟大夫樂霄為銅鞮大夫趙朝為平陽大夫僚安為楊氏大夫謂賈辛司馬烏為有力於王室故舉之謂知徐吾趙朝韓固魏戊餘子之不失職能守業者也其四人者皆受縣而後

見於獻子以賢舉也獻子謂成鱣吾與戊也縣人其以
我為黨乎對曰何也戊之為人也遠不忘君近不偪同
居利思義在約思純有守心而無淫行雖與之縣不亦
可乎昔武王克商光有天下其兄弟之國者十有五人
姬姓之國者四十人皆舉親也夫舉無他惟善所在親
疏一也詩曰唯此文王帝度其心莫其德音其德克明
克明克類克長克君王此大國克順克比比于文王其
德靡悔既受帝祉施於孫子心能制義曰度德正應和

曰莫照臨四方曰明勤施無私曰類教誨不倦曰長賞
慶刑威曰君慈和徧服曰順擇善而從之曰比經緯天
地曰文九德不愆作事無悔故襲天祿子孫賴之主之
舉也近文德矣所及其遠哉賈卒將適其縣見於獻子
獻子曰卒來昔叔向適鄭驥蔑惡欲觀叔向從使之收
器者而往立於堂下一言而善叔向將飲酒聞之曰必
驪明也下執其手以上曰昔賈大夫惡娶妻而美三年
不言不笑御以如皋射雉獲之其妻始笑而言賈大夫

曰才之不可以已我不能射女遂不言不笑夫今子少
不賜子若無言吾幾失子矣言不可以已也如是遂如
故知今女有力於王室吾是以舉女行乎敬之哉毋墮
乃力仲尼聞獻子之舉也以為義曰近不失親遠不失
舉可謂義矣又聞其命賈辛也以為忠詩曰永言配命
自求多福忠也獻子之舉也義其命也忠其長有後於
晉國乎冬梗陽人有獄魏戊不能斷以獄上其大宗賂
以女樂獻子將受之魏戊謂閻沒女寬曰主以不賄聞

於諸侯若受梗陽人賄莫甚焉吾子必諫皆許諾退朝
待於庭饋入召之比置三歎既食使坐獻子曰吾聞諸
伯叔諺曰唯食忘憂吾子置食之間三歎何也同辭而
對曰或賜二小人酒不夕食饋之始至恐其不足是以
歎中置自咎曰豈將軍食之而有不足是以再歎及饋
之畢願以小人腹為君子之心屬厭而已獻子辭梗
陽人定公二年獻子合諸侯之大夫于狄泉尋盟且令
城成周獻子南面衛彪傒曰魏子必有大咎干位以令

大事非其任也詩曰敬天之怒不敢戲豫敬天之渝不敢馳驅況敢干位以作大事乎明年諸侯之大夫城成周獻子泣政彪奚復曰將建天子而易位以令非義也大事奸義必有大咎晉不失諸侯魏子其不免乎是行也獻子屬役於韓簡子及原壽過而田於大陸焚焉還卒於甯

士景伯彌牟文伯之子也世為大夫周景王崩敬王即位王子朝爭立敬王居于狄泉頃公使景伯蒞周問故

景伯立于乾祭而問於介衆衆不直子朝景伯辭子朝
焉頃公之九年會諸侯于黃父謀王室也趙鞅令諸侯
之大夫輸王粟具戍人曰明年將納王宋樂大心曰我
不輸粟我於周為客若之何使客景伯曰自踐土以來
宋何役之不會何盟之不同曰同恤王室子焉得辟之
子奉君命以會大事而宋背盟無乃不可乎右師不敢
對受牒而退景伯告簡子曰宋右師必亡奉命以使而
欲背盟以干盟主無不祥大焉定公二年諸侯之大夫

城成周景伯計丈數揣高卑度厚薄仞溝洫物土方議
遠適量事期計徒庸慮材用書餼糧以令役於諸侯屬
役賦文書以授帥而效諸劉子明年將板築魏獻子屬
役於韓簡子宋仲幾不受功曰滕薛邠吾役也薛宰曰
宋為無道絕我小國於周以我適楚故我嘗從宋晉文
公為踐土之盟曰凡我同盟各復舊職若從踐土若從
宋亦唯命仲幾曰踐土固然薛宰曰薛之皇祖奚仲居
薛以為夏車正奚仲遷于邳仲虺居薛以為湯左相若

復舊職將承王官何故以役諸侯仲幾曰三代各異物
薛焉得有舊為宋役亦其職也景伯曰晉之從政者新
子姑受功歸吾視諸故府仲幾曰縱子忘之山川鬼神
其忘諸乎景伯怒謂韓簡子曰薛徵於人宋徵於鬼宋
罪大矣且已無辭而抑我以鬼神誣我也啟寵納侮其
此之謂矣必以仲幾為戮乃執仲幾以歸三月歸諸京
師城三旬而畢

韓獻子厥其曾祖萬曲沃莊伯之弟也萬得封於韓原

曰武子因以韓為氏武子生求伯求伯生子輿子輿生
獻子景公三年邲之戰獻子為司馬十一年從郤克伐
齊戰于鞏齊師敗績晉人逐之三周華不注獻子夢其
父子輿謂己曰且辟左右故中御而從齊侯齊郤夏御
頃公逢丑父為右郤夏謂頃公曰射其御者君子也頃
公曰謂之君子而射之非禮也射其左越于車下射其
右斃于車中綦毋張喪車從獻子曰請寓乘從左右皆
肘之使立於後獻子俛定其右故逢丑父得與公易位

將及華泉驂絰於木而止獻子執繫馬前再拜稽首奉觴加璧以進曰寡君使羣臣為魯衛請曰無令輿師陷入君地下臣不幸屬當戎行無所逃隱且懼奔辟而忝兩君臣辱戎士敢告不敏攝官承乏逢丑父使公下如華泉取飲頃公以免獻子獻丑父卻獻子將戮之丑父有辭獻子免之語具丑父傳明年晉作六軍以獻子為卿賞鞏之功也十五年晉人謀去絳諸大夫皆曰必居郇瑕氏之地沃饒而近鹽國利君樂不可失也獻子將

新中軍且為僕大夫公揖而入獻子從公立於寢庭謂
獻子曰何如對曰不可郇瑕氏土薄水淺其惡易覲易
覲則民愁民愁則墊隘於是乎有沈溺重腿之疾不如
新田土厚水深居之不疾有汾澮以流其惡且民從教
十世之利也夫山澤林藪國之寶也國饒則民驕佚近
寶公室乃貧不可謂樂公說從之晉遂遷于新田是歲
獻子從欒武子救鄭將與楚戰獻子與知莊子范文子
俱諫以為不可武子從之而還語具欒書傳中十七年

公以孟姬故討趙同趙括而裂其田獻子言於公曰成季之勲宣孟之忠不可以無後於是公復立趙武而反其田焉趙氏之再建於晉者獻子之力也厲公三年獻子將下軍從欒書及秦師戰于麻隧秦師敗績六年楚共王侵鄭欒書欲報楚獻子曰無庸使重其罪民將叛之無民孰戰三卻害伯宗譖而殺之及欒弗忌獻子曰卻氏其不免乎善人天地之紀也而驟絕之不亡何待七年從欒書與楚戰于鄢陵楚師敗績八年欒書中行

偃執厲公召獻子獻子辭曰昔吾畜於趙氏孟姬之讒
吾能違兵古人有言曰殺老牛莫之敢尸而況君乎二
三子不能事君焉用厥也於是厲公遇弑晉人立悼公
悼公立而樂書卒獻子為政楚人伐宋宋華元來告急
獻子曰欲求得人必先勤之成霸安彊自宋始也悼公
師于台谷以救宋遇楚師于靡角之谷楚師還悼公元
年獻子帥諸侯之師伐鄭入其郛敗其徒兵於洧上於
是東諸侯之師次于鄆以待晉師晉師自鄭以鄆之師

侵楚焦夷及陳公及衛侯次于戚以為之援晉於是乎復霸七年而獻子老致其仕焉荀瑩為政

韓宣子起獻子之子也獻子之長子曰無忌為公族大夫有廢疾獻子之告老也將立之辭曰詩曰豈不夙夜謂行多露又曰弗躬弗親庶民弗信無忌不才讓其可乎請立起也與田蘇游而曰好仁詩曰靖共爾位好是正直神之聽之介爾景福恤民為德正直為正正曲為直參和為仁如是則神聽之介福降之立之不亦可乎

獻子從之使宣子朝遂老悼公謂無忌仁使掌公族大夫悼公之九年以宣子為卿佐上軍平公十二年宣子聘于周王使請事對曰晉士起將歸時事於宰旅無他事矣王聞之曰韓氏其昌阜於晉乎辭不失舊宋向戌善於趙文子又善於楚令尹子木欲弭諸侯之兵以為名先以告趙孟趙孟謀於諸大夫宣子曰兵民之殘也財用之蠹小國之大菑也將或弭之雖曰不可必將許之弗許楚必許之以召諸侯則我失為盟主矣文子從

之於是晉楚合諸侯之大夫盟于宋十八年宣子代趙
文子為政公使聘于魯觀書於太史氏見易象與魯春
秋曰周禮盡在魯矣吾乃今知周公之德與周之所以
王也魯昭公享之季武子賦緜之卒章宣子賦角弓季
武子拜曰敢拜子之彌縫敝邑寡君有望矣武子賦節
之卒章既享宴于季氏有嘉樹焉宣子譽之武子曰宿
敢不封殖此樹以無忘角弓遂賦甘棠宣子曰起不堪
也無以及召公宣子遂如齊納幣見子雅子雅召子旗

使見宣子宣子曰非保家之主也不臣見子尾子尾見
彊宣子謂之如子旗大夫多笑之唯晏子信之曰夫子
君子也君子有信其有以知之矣自齊聘於衛衛侯享
之北宮文子賦淇澳宣子賦木瓜焉十九年鄭簡公朝
晉子豐之子公孫段相甚敬而卑禮無違者平公嘉焉
賜伯石州田州田欒氏之邑也欒氏亡范宣子趙文子
韓宣子皆欲之文子曰溫吾縣也二宣子曰自郤稱以
別三傳矣晉之別縣不唯州誰獲治之文子病之乃舍

之二宣子曰吾不可以正議而自與也皆舍之及文子為政趙獲曰可以取州矣文子曰退二子之言義也違義禍也余不能治縣又焉用州其以徼禍也君子曰弗知實難知而弗從禍莫大焉有言州必死豐氏故主韓氏伯石之獲州田也宣子為之請之為其復取之故是歲宣子如齊逆女公孫蠆以其女更公女而嫁公子人謂宣子子尾欺晉晉胡受之宣子曰我欲得齊而遠其寵寵將來乎鄭罕虎來賀夫人且告曰楚人曰徼敝邑

以不朝立王之故敝邑之往則畏執事其謂寡君而固
有外心其不往則宋之盟云進退罪也寡君使虎布之
宣子使叔向對曰君若辱有寡君在楚何害修宋盟也
君苟思盟寡君乃知免於戾矣君若不有寡君雖朝夕
辱於敝邑寡君猜焉君實有心何辱命焉君其往也苟
有寡君在楚猶在晉也二十一年宣子如楚送女叔向
爲介楚靈王將以宣子爲閹而使叔向爲司宮用蘧啟
彊之諫厚爲二子之禮而歸之昭公六年宣子聘於鄭

初宣子有環其一在鄭商至是謁諸鄭伯子產曰非官
府之守器也寡君弗知宣子買諸賈人既成矣商人曰
必告諸執政宣子請於子產子產對曰昔我先君桓公
與商人皆出自周世有盟誓以相信也曰爾無我叛我
無彊賈爾有寶賄我勿與知今吾子以好來辱而使敝
邑與商人食言是教敝邑背盟誓也毋乃不可乎宣子
辭玉曰起不敏敢求玉以徼罪焉語具子產傳宣子歸
六卿餞於郊宣子曰二三子請皆賦起亦以知鄭志子

蓄賦野有蔓草宣子曰孺子善哉吾有望矣子產賦鄭
之羔裘宣子曰起不堪也子太叔賦褰裳宣子曰起在
此敢勤子至於他人乎子太叔拜宣子曰善哉子之言
是不有是事其能終乎子游賦風雨子旗賦有女同車
子柳賦擗兮宣子喜曰鄭其庶乎二三君子以君命貺
起賦不出鄭志皆昵燕好也二三君子數世之主也可
以無懼矣宣子皆獻焉而賦我將子產拜使五卿皆
拜曰吾子靖亂敢不拜德宣子私覲於子產以玉與馬

曰子命起舍夫玉是賜我玉而免吾死也敢藉手以拜
頃公十二年宣子卒魏獻子代爲政

苗賁皇楚令尹鬬椒之子也鬬椒作亂楚莊王殺之而
滅其族成公二年賁皇來奔公以爲大夫食菜於苗遂
爲氏景公八年使郤克徵會於齊齊頃公帷婦人以笑
客郤克怒歸以言於公齊侯使高固晏弱蔡朝南郭偃
會及斂孟高固逃歸夏復會於斷道辭齊人晉執晏弱
於野王執蔡朝於原執南郭偃於溫苗賁皇使見晏桓

子歸言於公曰夫晏子何罪昔者諸侯事吾先君皆如
不逮舉言羣臣不信諸侯皆有貳志齊君恐不得禮故
不出而使四子來左右或沮之曰君不出必執吾使故
高子及斂孟而逃夫三子者曰若絕君好寧歸死焉爲
是犯難而來吾若善逆彼以懷來者吾又執之以信齊
沮吾不既過矣于過而不改而又久之以成其悔何利
之有焉使反者得辭而害來者以懼諸侯將焉用之晉
人緩而逸之厲公之五年伯宗爲三郤所讒見誅其子

伯州犂奔楚楚以爲太宰六年晉楚之師戰於鄢陵楚共王登巢車以望晉師伯州犂侍於王後凡晉軍之發號施令坐作進退悉以告王且指公卒所在時苗賁皇在厲公之側亦以王卒告公左右皆曰國士在且厚不可當也苗賁皇言於公曰楚之良在其中軍王族而已請分良以擊其左右而三軍萃於王卒必大敗之公從之大敗楚師射共王中目旦而戰見星未已楚子反命軍吏察夷傷補卒乘繕甲兵展車馬雞鳴而食唯命是

聽晉人患之苗賁皇徇曰蒐乘補卒秣馬利兵修陳固
列蓐食申禱明日復戰乃逸楚囚楚聞之懼其師夜遁
子反自殺

屈巫一名巫臣字子靈楚公族也爲申公故曰申公巫
臣楚莊王十七年伐蕭師人多寒巫臣曰王巡三軍拊
而勉之三軍之士皆如挾纊遂傅於蕭滅之而還莊王
之討陳夏氏也王欲納夏姬巫臣曰不可君召諸侯以
討罪也今納夏姬貪其色也貪色爲淫淫爲大罰周書

曰明德慎罰文王所以造周也明德務崇之之謂也慎
罰務去之之謂也若興諸侯以取大罰非慎之也君其
圖之莊王乃止子反欲取之巫臣曰是不祥人也是天
子蠻殺御叔弑靈侯戮夏南出孔儀喪陳國何不祥如
是人生實難其有不獲死乎天下多美婦人何必是子
反乃止王以予連尹襄老襄老死於邲不獲其尸其子
黑要烝焉巫臣使道之曰歸吾聘女又使自鄭召之曰
尸可得也必來逆之姬以告王王問屈巫對曰其信知

瑩之父成公之嬖而中行伯之季弟也新佐中軍而善
鄭皇戌甚愛此子其必因鄭而歸王子與襄老之尸以
求之鄭人懼於邲之役而欲求媚於晉其必許之王遣
夏姬歸將行謂送者曰不得尸吾不反矣巫臣聘諸鄭
鄭伯許之及共王即位將爲陽橋之役使屈巫聘於齊
且告師期巫臣盡室以行申叔跪從其父將適郢遇之
曰異哉夫子有三軍之懼而又有桑中之喜宜將竊妻
以逃者也及鄭使介反幣而以夏姬行將奔齊齊師新

敗曰吾不處不勝之國遂奔晉而因卻至以臣於景公
景公使爲邢大夫子反請以重幣錮之共王曰止其自
爲謀也則過矣其爲吾先君謀也則忠忠社稷之固也
所蓋多矣且彼若能利國家雖重幣晉將可乎若無益
於晉晉將棄之何勞錮焉初楚莊王之圍宋也師還子
重請取於申呂以爲賞田王許之巫臣曰不可此申呂
所以邑也是以爲賦以御北方若取之是無申呂也晉
鄭必至於漢王乃止子重以是怨巫臣子反欲取夏姬

巫臣止之遂取以行子反亦怨之景公十五年子重子
反殺巫臣之族子閻子蕩及清尹弗忌與襄老之子黑
要而分其室子重取子閻之室使沈尹與王子罷分子
蕩之室子反取黑要与清尹之室巫臣自晉遺二子書
曰爾以讒慝事君而多殺不辜余必使爾疲於奔命以
死巫臣請使於吳景公許之吳王壽夢說之乃通吳於
晉以兩之一卒適吳舍偏兩之一焉與其射御教吳乘
車教之戰陳教之叛楚寘其子狐庸焉使爲行人於吳

吳始伐楚伐巢伐徐子重奔命馬陵之會吳入州來子
重自鄭奔命子重子反於是乎一歲七奔命蠻夷屬於
楚者吳盡取之是以始大通吳於上國十七年公使屈
巫如吳假道於莒與渠丘公立於池上曰城已惡莒子
曰僻陋在夷其孰以我爲虞對曰夫狡焉思啟封疆以
利社稷者何國蔑有唯然故多大國矣唯或思或縱也
勇夫重閉況國乎不聽明年楚子重自陳伐莒圍渠丘
渠丘城惡衆潰楚入渠丘遂圍莒莒城亦惡旬餘而潰

竟如巫臣之言巫臣之子狐庸留於吳者吳王壽夢使
爲相任以政焉

通志卷九十



總校官庶吉士臣侍 朝
校對官檢討臣季學錦
謄錄監生臣王 詢